

Rom Lenji Leta Pol Le Rorori Utu iviva

Pol le vaghiliya theghetoniye e tine i wa Korinita. Le yakuyaku e ghembako iyako tine, ghayamoyamo ngoreiye va i roriya letake iyakewe na i variye i wa wenjiya ralonwelonweghathi inanji Rom e tine. Ralonwelonweghathiko thiyako vavana thiye Jiu gharighariniye, ko iyemaenge thi ghanagha moli thiye ma Jiu gharighariniye. Pol va nuwaiya moli i wa Rom na ve thuwenjiya ralonwelonweghathi e valivanjako iyako, ko amba i mwandi na i wa Spein ele valivanja (1:11-12; 15:23-24). Ko iyemaenge va e mbanjako iyako ma valikaiwae i njaoko i wa Rom, kaiwae ekelesiya e valivanja Masedoniya na Akaiya, Korinita ele valivanjako tine, thi vivatha lenji mwaewo na thi giyawa Pol i yomban wenjiya ekelesiya inanji Jerusalem e tine (15:25-28).

Tembe ngoreiyeva e letake iyake tine Pol i utuna wenjiya Rom Toto Thovuye kaiwae. Renuwana laghiye moli letake iyake e tine ina 1:17, ina, "Toto Thovuye i woranjiya weinda, kaiwae Loi iye i thovuye moli budakai i dagerawe i vakatha ngoreiye wenjiya thavala thi lonweghathi." Pol i govambwara weinda gharigharike wolaghiye, thiye Jiu na ma Jiu gharighariniye, thiye thari gharavakatha Loi

e marae (1:18–3:20). Ko iyemaenge Loi mbe i wovathovuthovuyenangi enge gharighari thi lonweghathigha Jisas Krais (3:21–4:25). Na Pol tembe i utunava yawali togha kaiwae, ra yaku e tine kaiwae Loi va i wovathovuthovuyenainda (Vangothiye 5–8).

Vangothiye 9 ghaghad 11 Pol i ghatha vuyowo regha. Vuyowoko iyako ngoreiyake. Wabwi Isirel thiye Loi le tututhi gharighariniye, ko iyemaenge ma thi lonweghathigha Jisas Krais iya kaiwae ma thi vaidiya vamoru. Amba Pol i vaito, “Ngoronga wabwi Isirel kaiwanji? Loi le vakatha wenji thare i tomethi? Thare i botewongi?” Ko amba tembe i thombeva le vaitoko iyako.

Pol tembe i govambwarava ngoronga ghinda ghandathanavu na la vakatha, thavala kaero i wovathovuthovuyenainda, la yakuyaku na la vakatha ngoronga ekelesiya e tine, wenjiya ghandane na wenjiya rambarombaro (12:1–15:13). Le utuutu momouniye Pol ina ghauneko thi gomwaewo wenjiya ralonwelonweghathi inanji Rom e tine (Vangothiye 16).

¹ Ghino Pol, Krais Jisas le rakakaiwobwaga na ghaliṅae gharaghambi. Loi va i ghathango ya tabo ghaliṅae gharaghambi na ya yathu Toto Thovuye.

² Totoko Thovuye iyako Loi va i dagerawe mbanja i vivako mbala ghaliṅae gharautu thi worangiya na thi rorinjona Buk Boboma e tine.

³ Totoko Thovuye iyako nariye utuniye, iye ghandanda Giya Jisas Kraisi. Mbunima na madibe ele valivanga, iye Deivid rumbuye,

⁴ ko iyemaenge Loi i vatomwe iye Nariye, kaiwae Nyao Boboma le vurigheghe e tine va i vakatha na tembe i thuweiruva mare e tine.

⁵ Amalaghiniye i mwaewo e ghino na i giya bebeke iyake e ghino, ya tabo ghalingae gharaghambi, ghatarawa kaiwae, mbala thiye ma Jiu valivanga na valivanga thi lonweghathi na thi ghambu.

⁶ Na ghemi tembe ngoreiyeva, inami e wabwina iyana tine, Loi kaerova i ghathanga na hu tabo Jisas Kraisi le wabwi gharighariniye.

⁷ Taulaghina ghemi huya yaku Rom e tine, Loi i gharethovunga na kaerova i ghathanga hu tabo le gharighari.

Ya nanngo weya Loi Ramanda na ghandanda Giya Jisas Kraisi lenji mwaewo na lenji gharemalili i riyevanjara gharemina.

Pol nuwaiya moli i wa Rom

⁸ I viva moli ngoreiyake: Weya Jisas Kraisi ya vata ago weya lo Loi taulaghina ghemi kaiwami, kaiwae lemi lonweghathi weya Kraisi valivangake wolaghiye kaero thi utunja.

⁹ Loi iya ghino ya kaiwokewe na e gharenguke laghiye ya vatomwengo ya utunja Toto Thovuye Nariye utuniye, iye ne i vaemunjoruna e ghemi budakai iya ya utunake emunjoru moli. Na Loi i ghareghare mbanake wolaghiye ya renuwanyakikinga

¹⁰ elo nanngo tine. Ya nanngo valaṅa weya Loi na thonḡo le renuwaṅa ṅgoreiye valikaiwae ya ghaona e ghemi. Mbaṅa kaero molao nuwanḡuiya ya ghaona e ghemi na mbanake ma ya ghareghare ne ṅgoronḡa na ya ghaona, ko elo nanḡoke enḡe ne valikaiwae.

¹¹ Nuwanḡuiya moli ya thuwenḡa mbala valikaiwae ya giya the thalavu e ghemi i mena Loi e Une na valikaiwae i thalavugha yawalimi na i vurigheḡe.

¹² Nuwanḡuiya ra vethalathalavuinda; lo lonḡweghathike i vavurigheḡenḡa na lemi lonḡweghathina i vavurigheḡenḡo.

¹³ Lo bodaboda, nuwanḡuiya hu ghareghare, mbaṅa i ghanagha ya munje ya ghaona e ghemi, ko iyemaenḡe ghamba thalativa i ghanagha e ghino ghaghad mbanake. Lo renuwaṅa ṅgoreiye nuwanḡuiya ya ghaona na lo kaiwo e ghemi une ve yomara ṅgoreiya kaero i yomara wenḡiya wabwi vavana thiye ma Jiu gharighariniye e tinenji.

¹⁴ Iyake ṅgoreiye wo ya vamodo njogha modae laghiye, na iwaenḡe ya wa na ya utuṅa Toto Thovuyeko iyako wenḡiya gharigharike wolaghiye; wenḡiya thavala thi ghambugha Grik* ghanjithanavu na thavala ma thi ghambu, na tembe ṅgoreiyeva thavala e lenji ghareghare na thavala unounonḡi.

* **1:14** Thiye Grik gharathimbathimbaṅi ghanjimbaṅa thi mbaro yambaneke laghiye. Mbaṅa Pol va i rori letake iyake kaero Rom i mbaro yambaneke laghiye. Ko iyemaenḡe gharighari thi renuwaṅa Grik ghanjithanavu i thovuye moli.

15 Ko righe moli vara iyako iya kaiwae nuwanjuiya moli tembe ya utunjava Toto Thovuye e ghemi, ghemi huya yaku Rom e tine.

16 Ma ya monjinana Toto Thovuye, kaiwae Totoko Thovuye iyako iya Loi va i vakaiwonjako na le vurigheghe e tine i vamorungiya thavala thi lonweghathi. I viva moli thiye Jiu kaiwanji, ko amba thiye ma Jiu ngoreiye tembe kaiwanjiva.

17 Toto Thovuye e tine Loi i worangiya ngoronga valikaiwae na i wovarumwarumwaruna gharighari, na iyake kaiwae thiye thi lonweghathi Krai. Iyake i manjamanjala na emunjoru kaiwae Loi le utu e Buk Boboma tine ina, "Thiye ya wovarumwarumwarunangi kaiwae thi varemijengo, thiye e yawalinji memeghabananiye."

Thari i ngarungiya gharigharike wolaghiye

18 E buruburu Loi kaero i worangiya weinda le ghatemuru wengi gharighari ma Jiu ghanjithanavu ma ngoreiye Loi ghathanavu na ma e gharumwaru, thiye lenji vakathako rarithari thiyako i rogana the bigi emunjoru moli Loi kaiwae wengiya gharighari.

19 Loi i ghatemuru kaiwae budakai valikaiwae gharighari thi ghareghare Loi kaiwae i manjamanjala wengi, kaiwae Loi tembe ghamberegha i vamanjamanjalana wengi.

20 I ri mbananiye vara Loi va i vakatha yambaneke na ghaghad noroke, Loi le vurigheghe memeghabananiye na bigibigiko iya ma Loi

enge valikaiwae i vakathako, Loi va i vakatha gharighari valikaiwae thi thuwe. Iya kaiwae gharighari ma e lenji righe.

²¹ Othembe thi ghareghareya Loi, thi wovanjonanjonan ngoreiye iye ma Loi, ma thi wovavwenyevwenyenya, na ma thi dage mwaewowe. Ko iyemaenge lenji renuwana ma unouno enge na gharenji i momouwo wengi.

²² Othembe thina va thi thimba, ko iyemaenge thi tabo unounongi.

²³ Na thi botewoyathu Loi ravwenyevwenye na memeghabananiye ghakururu na thi kururu wengi enge lenji monjemonjengiko ngoranjiya gharighari mane thi meghabana, na tembe thi kururu wengiva ma, thetheghan thi longalonga na thetheghan thi li e gharenji vwatae iya thi monjengiko.

²⁴ Iya kaiwae Loi i viyathungi na thi vakatha the thanavu raraithari yawalinjiko nuwaiya na thi vevakatha yathima thanavuniye raraithari.

²⁵ Thi botewoyathu utu emunjoru Loi kaiwae iyemaenge thi lonweghathi kwan; thi kururu wengi lenji vakavakatha na thi kaiwo wengi, na ma thi kururu weya Ravakatha, othembe amalaghiniye ghaberegha mbala ra tarawe mbanake wolaghiye. Mbwana. Ngoreiye.

²⁶ Lenji vakathako iyako kaiwae Loi i viyathungi na thi vakatha yathima thanavuniye vavanava na i monjimonjina. Wanakau thi vevakatha vathari wengi ma ngoreiya va inako na ngoreiye.

²⁷ Tembe ngoreiyeva, ghimoghimoru ma thi vakatha ngoreiya menjako na ngoreiye.

Tembe thi venumwengiva na thi vakatha ghanjithanavu. Thi vakatha ngoreiyako wengiya lenji valighimoghimoru na modae Loi i giya vuyowae wengi.

²⁸ E vwatava, kaiwae ma thi renuwanja Loi gharerenuwanja iye bigi laghiye, Loi i viyathungi na thi ghambugha lenji renuwanja raraithari na vakathako iya thava thi vakathako thi vakavakatha.

²⁹ Thari tomethi na tomethi kaero i riyevanjarangi ngoreiya vakatha raithari, votha, thari thanavuniye, yamwakabu, gabo, wogaithi, utu kwanikwan na thi vonivoya vavana ghanji. Thi liliya utu,

³⁰ thi utuutuvathari wengiya ghanjiune, thi botewo Loi, nemo i utungi na thi wovorevorenangi. Thi tamwe enge thari ghavakatha, ma thi wovatha oramanji na otatanji lenji utu,

³¹ ma thimba ina e yawalinji, ma thi renuwanakikiya lenji dagerawe, ma gharenji wengi gharighari na ma thi ghareviri kaiwanji.

³² Emunjoru, othembe kaero thi ghareghare Loi le mbaro inja thavala lenji vakatha ngoranjiyako valikaiwanji moliya mare. Ko iyemaenge mbe thi vakavakatha vara iya vakathako thiyako, na ma mbe iyaengeko, tembe thi wovathovuthovuyenangi ghanjiuneko iya thi vakavakatha thanavuko iyako.

Loi iye raghathaghatha thovuye moli

¹ Wou, ghen ma e len righe na u wovatharithariŋgiya gharighari vavana thi vakavakatha thari ŋgoranjiyako, kaiwae the valivaŋga u wovatharithariŋgiya gharighariko thiyakowe, ghen tembe u wovatharithariŋjava ghanimbereghana, kaiwae ghen tembe u vakavakathava iya thanavuko thiyako.

² Kaero ra ghareghare Loi ne i wovatharithariŋgiya thavala thi vakavakatha thanavu ŋgoranjiyako na le ghathaghathako ne i mboromboro.

³ O ghen, u wovatharithariŋgiya gharighariko thiyako lenji vakathako kaiwae, ko iyemaenŋe iya thi vakavakathako ghen tembe iyava u vakathana. Ko len renuwaŋa u munjeva ne u voiteta Loi le wovatharithariko?

⁴ O ko ghen u botewo Loi le gharethovu laghiye kaiwan na le ghatanaghathinŋe. Ko ma u ghareghare Loi le gharenja e ghen kaiwae nuwaiya i vanŋunŋe na vo ndeghereiyewana len thari?

⁵ Ko iyemaenŋe gharena i vurigheghe moli na u botewo u uturaŋgiya len thari na u roiteta. Iya kaiwae tembe u vavalaghiyenjava ghanivuyowona mbananiye Loi ne le ghatemuru ve yomara gharighari lenji thari kaiwae. Na e mbanako iyako thi thuweya Loi le ghathaghatha i thovuye na i mboromboro.

⁶ Loi ne i giya lolo regha na regha modae, kaiwae i gorogoru weya ŋgoronŋa le vakatha.

7 Gharighari vavana thi rorovurigheghe vakatha thovuye kaiwae, kaiwae nuwanjiya Loi i tarawengi, i wovavwenyevwenyenangi na i giya yawali memeghabananiye wengi. Loi iye i giya yawali memeghabananiye.

8 Ko iyemaenge gharighari vavana mbe thi rerenuwana enge thiye lenji thovuye kaiwae, na thi botewoyathu Loi le renuwana emunjoru na thi ghambugha thari ghakamwathi. Loi le ghatemuru weiye le gaithi ne i lithi wengi.

9 Nevole vuyowo na viri i yomara wengiya gharigharike wolaghiye thi vakavakatha thari. Iyako emunjoru Jiu utuninji na tembe ngoreiyeva thiye ma Jiu gharighariniye.

10 Ko iyemaenge gharighari thi vakavakatha thovuye Loi ne i tarawengi, i wovavwenyevwenyenangi na i vagharemalilingi. Iyake emunjoru Jiu utuninji na tembe ngoreiyeva thiye ma Jiu gharighariniye.

11 Loi ma mbe i vangavanga enge, ele ghatha tineko i vamboromboro.

12 Thongo Mosese le Mbaro ma ina wengi na thi vakatha thari, Loi ne i wovatharithariningi na i giya ghanjivuyowo, othembe ma Mosese le Mbaro ina wengi. Thavala Mosese le Mbaro ina wengi na thi vakatha thari, Loi ne i gathanji Mosese le Mbaroko e tine.

13 Loi ma i wovarumwarumwarunangiya gharighari kaiwae mbema thi lonje enge Mbaroko e yanawanji, ko mbe iyaenge vara thavala thi lonje na thi ghambu.

14 Mosese le Mbaro ma ina wengi thiye ma Jiu gharighariniye, ko thongo lenji vakatha

ngoreiya mbaro i rangimawe othembe Mosese le Mbaro ma ina wenji.

¹⁵ I rangima e gharenjiko ngoreiya Mbaro le renuwana, na iyake i vatomwe Loi va i rorinjona e gharenji. Mbanja vavana lenji renuwajako tembe i worawenji lenji vakavakatha i thari, na mbanja vavana lenji renuwajako i woranjiya wenji thi vakatha thovuye.

¹⁶ Bigibigike thiyake ne thi yomara mbanjaniye Loi ne i woranjiya lenji renuwana thuwele na weya Jisas Krai i ghathangi. Totoko thovuye iya ya utujako i woranjiya ngoreiyako.

Jiu na Mosese le Mbaro

¹⁷ Na ngoronga ghen? Uja, "Ghino Jiu", na mbe u ndeghathi vara Mosese le Mbaroko tine, na u wovorevorenange ghanimbereghana, uja, "Ghino ya tubwe weya Loi."

¹⁸ U ghareghare budakai Loi nuwaiya u vakatha, na kaiwae Mbaroko iyako kaero i vagharenge iyanjaniya thovuye moli.

¹⁹ U renuwana e ghen valikaiwan u viva wenjiya maranji i kwaghe na i manjamanjala wenjiya thiye inanji e momouwo,*

²⁰ u ghareghare emunjoru e ghen valikaiwan u vavathanavu wenjiya numounouno, na u vavaghare wenjiya yawalinji amba kovukovu. Kaiwae Mosese le Mbaro ina e ghen, u munjeva u ghareghareya bigibigiko wolaghiye na emunjoruko wolaghiye ina wenje.

²¹ U tabo ravavaghare wenjiya gharighari vavana, ko ngoronga enge na ma mbe u vavaghare

* **2:19** Thiye ma Jiu gharighariniye.

e ghen ghanimberegha? U vavaghare na uņa, “Tha u kaivi,” ko naka ghen mbe u kakaivina?

²² Ghen u utuņa, uņa “Tha u yathima,” ko naka ghen mbe u yathiyathimana? Ghen u botewo moliya loi vatavatad; ko naka ghen mbe u kakaiva loi vatavatadiko lenji ghamba yaku?

²³ Ghen u wovoreņa ghanimberegha na uņa Mosese le Mbaro ina e ghen; ko ghen u nejivaviya Loi ghamwae mbaņa u kivwala le mbaro?

²⁴ Ngoreiya Buk Boboma le woranġiya, iņa, “Lemi vakathana kaiwae thiye ma Jiu thi utu-vathari weya Loi.”

²⁵ Kiteniyathu thanavuniye e ghatovuye thonġo u vakatha ngoreiya Mbaroko iyako le woranġiya, ko iyemaenġe thonġo u kivwala mbaroko, len kiteniyathu ma e ghatovuye.

²⁶ Tembe ngoreiyeva, thonġo thela ma Jiu loloniye iye ma i wo kiteniyathu thanavuniye, i ghambughu nġoronġa Mosese le Mbaro i woranġiya; Loi ne i rerenuwana kaiwae na iņa iye ngoreiya i wo kiteniyathu thanavuniye.

²⁷ Ghemi Jiu Mbaro ina wenġa va thi rorinjona e Buk, na hu wo kiteniyathu thanavuniye e riwamina, ko ana thiye ma Jiu gharighariniye thi ghambughu mbaro. Thiye thi woranġiya weinda ghemi valikaiwami hu vaidiya vuyowae.

²⁸⁻²⁹ Ko thelaenġe vara iye Jiu loloniye moli na emunġoru i wo kiteniyathu thanavuniye moli? Lolo ma i tabo na Jiu loloniye kaiwae gathanavu ngoreiye Jiu ghanjithanavu na i wo kiteniyathu thanavuniye e riwae, ko iyemaenġe thonġo lolo

regha e ghareko iye Jiu, emunjoru iye Jiu loloniye moli. Thongo lolo i wo kiteniyathu thanavuniye kaiwae thi ghambugha rorori Mosese le Mbaro e tine, iyako ma i vaemunjoruṅa iye i tubwe weya Loi. Lolo i tubwe weya Loi mbaṅa Une Boboma i ten na i ru loloko e ghare na i vavaghile. Loloko iyako mane i vaidiya ghatarawa wenḡiya gharighari, ne i vaidi enḡe weya Loi.

3

¹ Thongo utuutuko iyako emunjoru, i thovuye iye Jiu loloniye? Na kiteniyathu thanavuniye mbene i vaidiya ghathovuye mun?

² Mbwana, i ghanagha moli i thalavu wenḡi Jiu. I viva Loi va i wogiya le utuutu wenḡiya Jiu na thi njimbukiki.

³ Ne ḡgoroṅga thongo vavana ma thi loḡweghathi Loi le utuutuko? Thare lenji goruweyathuko iyako i vakatha Loi ma i vamboromboro ḡgoreiya le dageraweko?

⁴ Nandere moli! Loi i dagerawe i vamboromboro mbaṅake wolaghiye. Othembe gharigharike wolaghiye thi kwanikwan, iye rautuutu emunjoru; ḡgoreiya Buk Boboma le woraṅgiya, Loi iṅa,

“Mbaṅa ne u utu len utuutu ne i woraṅgiyanḡe len utuna i rumwaru,
na mbaṅa gharighari ne thi wonjowenḡe, ne u kivwalanḡi.”

⁵ Ko thongo ghandathanavuke raraihari i woraṅgiya Loi iye i rumwaru moli, ḡgoroṅga ne

raṅa? Valikaiwae raṅa Loi iye ma i vamboromboro mbaṅa weiye le gaithi ne i lithi ghathari modae wenḡiya gharighari? Lo utuutuke iyake ḡgoreiya gharighari lenji utuutu.

⁶ Ma ḡgoreiye moli! Thonḡo Loi iye mava i wovatharithariṅa ghinda Jiu kaiwae, ne ḡgoronḡa enḡe na i ghathanḡiya yambaneke gharighariniye?

⁷ Ko iyemaenḡe lolo regha mbwata le wogaithi iṅa, “Thonḡo lo kwan i vakatha gharighari thi ghareghare wagiya we Loi iye i renuwanakikiya le dagerawe ne i vamboromboro, une i yomara Loi iye ravwenyevwenye na i thovuye moli. Kaiwae utuutuko iyako emunjoru, buda kaiwae Loi i ghathanḡo ḡgoreiya ghino thari gharavakatha?”

⁸ Thonḡo utuutuko iyako emunjoru, mbala tembe i thovuyeva raṅa, “Valikaiwae ra vakatha thari mbala i vakatha na thovuye i ranḡi.” Ma yaṅa utuutuko iyako, ko iyemaenḡe gharighari vavana thi utuvathari e ghino na thi wonjowenḡo thiṅava ya utuṅa utuutuko iyako. I thovuye moli Loi ne ve lithi wenḡiya thiye thi utu ḡgoreiyako.

Ma lolo regha i thovuye Loi e marae

⁹ ḡgoronḡa ne raṅa? Ko ana ghime Jiu mbe e lama thovuye na wo thovuye kivwalanḡiya thiye ma Jiu gharighariniye ḡgoreiye? Nandere moli, kaiwae kaero ma woranḡiya, thiye Jiu na ma Jiu gharighariniye ḡgoreiye, taulaghike thari i mbaronḡanda.

¹⁰ ḡgoreiya Buk Boboma le utuutu, iṅa: “Ma lolo regha i rumwaru, nandere moli.

- 11 Ma raghareghare regha inawe,
ma regha i tamweya Loi.
- 12 Taulaghike kaero thi ndeghereiyewana Loi,
kaero thi tabona bigi bwagabwaga.
Ma tembe reghava i vakavakatha thovuye
ghakamwathi, nandere moli.”
- 13 “I rangima e ghaenjiko ngoreiya thi tighira
ghabubu,
Maminjiko mbe i utu kwanikwan enge
na utuutu i dobu e ghaenjiko njimwae
ngoreiya mwata mamate i ghariinda.”
- 14 “Utu raraithari na thighiya utuutuniye i riye-
vanjara ghaenjiko.”
- 15 “Gheghenji i maya enge gabo kaiwae.
- 16 Anja thi reja thi mukuwo na nuwathari
laghiye mbe inawe enge.
- 17 Vanevane ghakamwathi ma thi ghareghare.”
- 18 “Loi ghamararu ma ina wenji.”
- 19 Kaero ra ghareghare, ngoronga mbaro le
utuutu, i utuutu thavala kaero inanzi mbaroko
iyako e raberabe, mbala ma valikaiwae lolo
regha i woraweya le varivoru e thari, na
gharigharike wolaghiye e yambaneke laghiye Loi
i wovatharitharinjani.
- 20 Kaiwae ma lolo regha i rumwaru Loi
e marae, kaiwae i ghambugha mbaro le
renuwanja, ko mbaro enge i vakatha lolo na i
ghareghare iye thari gharavakatha.

Lojweghathi e tine Loi i wovarumwarumwaruᅇa lolo

²¹ Ko e mbanake iyake Loi kaero i vugha kamwathi na e tine i wovarumwarumwaruᅇangiya gharighari, ko iyemaenge iyake ma i mena mbaro e ghaghambu tine. Kamwathike iyake Mosese le Mbaro na ghalinae gharautu kaerova thi utuᅇa mbanᅇa i vivako.

²² Loi i wovarumwarumwaruᅇangiya gharighari kaiwae thi lojweghathigha Jisas Krais. Ralojwelojweghathike wolaghiye utuninjiya iyako, kaiwae gharigharike wolaghiye mboromborongi.

²³ Na mboromborongi kaiwae gharigharike wolaghiye kaero thi thari, na vwenyevwenyeko gharu iya Loi va i renuwana na ngoreiyako kaiwanji, i bwagabwaga moli wengi.

²⁴ Ko iyemaenge Loi le mwaewo bwagabwaga e tine, taulaghiko i wovarumwarumwaruᅇangi, kaiwae Krais Jisas i vamodo njoghangi thari e tine.

²⁵ Loi va i vakatha Jisas iye thari ghamba vowo gharighari kaiwanji. Thavala thi lojweghathigha Jisas i mare na madibe i voru, Loi i wovarumwarumwaruᅇangi. Vowoko iyako i worangiya iye i vamboromboro mbanᅇa me vivako ma i lithi wengiya gharighari thi vakatha thari. Va i vakatha ngoreiyako kaiwae i ghatanaghati.

²⁶ Va i vakatha ngoreiyako, mbala gharighari thi thuwe i rumwaru, kaiwae iye i vamboromboro na i rumwaru

¹ Eibraham iye ghinda rumbunda, na ngoronga ne rana iye kaiwae na va ngoronga na renuwanako iyako i yolawawe?

² Thongo Loi va i ghatha na inja iye lolo i rumwaru le vakathako thovuye kaiwae, valikaiwae moli i wovoreña ghambergha. Ko iyemaenge Loi e marae Eibraham ma ele righe na valikaiwae i wovoreña ghambergha.

³ Kaiwae Buk Boboma inja, “Eibraham i lonweghathi, iya kaiwae Loi i thuwe iye lolo i rumwaru le lonweghathiko kaiwae.”

⁴ Mbanja lolo i kaiwo i mbana modae. Modoko iyako ma ngoreiya ghamwaewo, ko iyako le kaiwoko modae.

⁵ Ko iyemaenge Loi ma i wovarumwarumwaruṅa lolo regha le kaiwoko modae kaiwae. Iyemaenge kaiwae i lonweghathigha iye i wovarumwarumwaruṅa thari gharavakatha.

⁶ Deivid va i utuṅa tembe ngoreiyeva iyako. Deivid va inja thongo Loi i worawe loloko iyako e ghamwae, na ma kaiwae i vamboromboro Mosese le Mbaroko gharerenuwaṅa, loloko iyako i warari moli.

⁷ Deivid va inja,
 “Loi i worawengi e ghamwae,
 thavala Loi kaero i numotena lenji thari na
 i yabo.

⁸ Loi i worawe e ghamwae,
 thela thongo Loi mane i rerenuwanakiki le
 thariko kaiwae.”

⁹ Ngoronga, Loi mbe i worawengi enge e ghamwae thavala thi wo kiteniyathu thanavuniye, o thavala ma thi wo kiteniyathu thanavuniye tembe ngoreiyeva? Mbwana, thiye ma thi wo kiteniyathu thanavuniye tembe ngoreiyeva. Kaero ma utuna, Loi va i thuweya Eibraham iye lolo i rumwaru, le lonweghathi kaiwae.

¹⁰ Va i yomarawe mbanja vama i wo kiteniyathu thanavuniye na e ghereiye, o kiteniyathu thanavuniye e ghamwae? Mava kiteniyathu thanavuniye e ghereiye, iye va i rumwaru amba muyai i wo kiteniyathu thanavuniye.

¹¹ Kiteniyathuko iyako iye nono, i worangiya Loi kaero i wovarumwarumwaruna Eibraham le lonweghathi kaiwae. Iya kaiwae ralonwelonweghathiko wolaghiye, othembe thavala ma thi wo kiteniyathu thanavuniye, rumbunjiya Eibraham, kaiwae lenji lonweghathi kaiwae Loi i thuwengi thiye thi rumwaru.

¹² Tembe ngoreiyeva, ralonwelonweghathi thavala kaero thi wo kiteniyathu thanavuniye, tembe rumbunjiva Eibraham, thiye thi vurimban lonweghathi e ghakamwathi ngoreiya rumbunji Eibraham va i rejawe amba muyai i wo kiteniyathu thanavuniye.

¹³ Ngoreiye, ma kaiwae va i ghambu ngoreiya Mosese le Mbaro le worangi na Loi i dagerawe weya Eibraham na orumburumbuye na ne thi wo yambaneke. Ko kaiwae Loi va i dagerawe weya Eibraham kaiwae ma i ghatha na i thuwe iye i rumwaru kaiwae i lonweghathi.

14 Na kaiwae thongo le dageraweko mbene i wovengi enge thavala thi ghambugha Mbaro, ko kaero i govambwara lonweghathi iye bigi bwagabwaga na Loi le dageraweko ma e uneune.

15 Mbaro i womena Loi le lithi thari ghar-avakatha kaiwanji. Iya kaiwae thongo ma Mbaro mbala ma ra valananiya Mbaro.

16 Lenji lonweghathiko kaiwae budakaiya Loi va i dagerawe ne thi vaidi. Loi i mwaewo bwagabwaga wengi na valikaiwae Eibraham orumburumbuyeko wolaghiye thi vaidiya budakai va i dagerawe wengi. Ma mbe thavala enge thiya yaku Mbaro e raberabe valikaiwanji thi wo, ko tembe ngoreiyeva gharigharike wolaghiye thavala thi lonweghathi ngoreiya Eibraham, iye taulaghike rumbunda.

17 Ngoreiya Buk Boboma le worangiya, inja, “Kaerova ya worawenge na ghen vanautuma vavana rumbunjiya ghen.” Eibraham iye rumbunda Loi e marae. Va i lonweghathigha Loi na Loike iyake valikaiwae i vakatha budakaiya i mare na kaero e yawayawaliyeva na inja na budakai mava thi yomara, ngoreiya kaerova thi yomara.

18 Mava righe thovuye regha na valikaiwae Eibraham i worawe ghamidi na dageraweko i tabo na emunjoru, ko othembe va i worawe le vareminjeko ghamidi na i roghagha dageraweko ne i yomara. Kaiwae Loi va i dagerawe na inja, “Orumburumbu nevole lemoyo ngoreiyako, ma valikaiwae thi vaona.”

¹⁹ Othembe Eibraham ghatheghathegha mbalavama i wo hothanjari, na madibaeko vama ngoreiya i mare. Na va i renuwana levo Sera tembe ngoreiyeva kaiwae va i kwama. Othembe va i gharegharengiya thiyako, le lonweghathi weya Loi mava i njavovo mun.

²⁰ Kaiwae le lonweghathiko mava i numovuvurana Loi le dagerawekowe, ko iyemaenge le lonweghathi vama i tabo na i tabo enge na i wovavwenyevwenyena Loi.

²¹ Va i ghareghare e ghare emunjoru moli Loi valikaiwae ne i vamboromboro budakaiya va le dagerawe.

²² Iya kaiwae “Loi va i wovatha le lonweghathiko na i govambwara mbema emunjoru iye lolo i rumwaru.”

²³ Utuutuko iyako ma mbe Eibraham e ghathovuye enge kaiwae,

²⁴ ko iyemaenge ghinda tembe ngoreiyeva. Mbala ra ghareghare Loi ne i wovathainda ghinda gharighari rumwarumwaruniye thonjo ra lonweghathigha amalaghiniye, iye va i vakatha na ghanda Giya Jisas Krai tembe i thuweiruva mare tine.

²⁵ Loi i vatomweyathu Jisas i mare la thari kaiwae, na tembe i vakatha na i thuweiruva mare e tine na mbala i wovarumwarumwarunainda.

5

Jisas i vakathainda namoghamwanda weinda

Loi

¹ Iya kaiwae, kaiwae kaero i wovarumwarumwarunainda la lonweghathi

kaiwae, weinda Loi ra vanevane. Vanevaneko iyako i yomara weya ghanda Giya Jisas Krais,

² kaiwae i vanjinda ra wa weya Loi na ra vaidiya le mwaewo bwagabwaga lonweghathi e tine, na noroke ra yakuwe. Tembe ngoreiyeva la warari i laghiye, kaiwae weinda la gharematuwa nevole weinda Loi ra wo le vwenyevwenye.

³ Na ma mbe iyaengeko, tembe ra warariva e ghandavuyowo tine, kaiwae ra ghareghare vuyowo i vatada ghatanaghathi e yawalinda.

⁴ Kaiwae ra ghatanaghathi, Loi i vaemunjorunjinda, na iyako une weinda la gharematuwo ra roroghaha Loi ne i vavwenyevwenyenjinda.

⁵ Gharematuwoko iyako gharematuwo e une-une, na ma i vagharelaghilaghiyenjinda kaiwae Loi i gharethovu laghiye kaiwanda na i giya Une Boboma i ru e gharendake na Loi le gharethovu i riyevanjarangi.

⁶ Kaiwae othembe mbanja ghinda vamba ra njavovo moli, e ghambanja thovuye moli tine Krais i mare ghinda rarithari kaiwanda.

⁷ Mbe mbanja vavana enge lolo regha i vatomweya yawaliye na i mare thela i ghambugha mbaro kaiwae, ko mbwata valikaiwae enge lolo regha ghamberegha i vatomwe na i mare lolo regha gathanavu thovuye kaiwae.

⁸ Ko iyemaenge Loi i vatomwe weinda le gharethovu le laghilaghiye ngoreiyake: mbanja vamba inanda thari e tine Krais i mare kaiwanda.

⁹ Krais le mare kaiwae Loi i wovarumwarumwarunjinda, iya kaiwae

ra ghareghare wagiyawe nevole Krai*s* i vamoruinda Loi le ghatemuru e tine.

¹⁰ Kaiwae mbananiye vamba ra thighiyawana Loi, ko amba i vakathainda na tembe valinimaeva ghinda Nariye ele mare. Mbanake kaero namoghamwanda weinda, emunjoru ne i vamoruinda kaiwae nariye e yawayawaliye.

¹¹ Na ma mbe i vamoruinda enge, ko Loi i vakathainda na ra warari kaiwae ghanda Giya Jisas Krai*s* iye kaero i vakathainda na namoghamwanda weinda Loi.

*Ra mare weya Adam, na weya Krai*s* e yawayawalinda*

¹² Weya lolo regha thari i yomara e yambaneke, na thariko iyako i womena mare. Iya kaiwae mare ma i lawalawa enge wenjiya gharigharike wolaghiye, kaiwae taulaghiko thi thari.

¹³ Amba muyai Loi i giya Mbaro weya Mosese, thari thanavuniye vama ina e yambaneke. Ko kaiwae ma vamba mbaro ina e yambaneke ma valikaiwae ranja, "Gharighariko thiyako thi vakatha thari kaiwae thi raka mbaro."

¹⁴ Ko i ri weya Adam na i mena ghaghad Mosese ghambanja, mare va i mbaronja yambaneke, othembe thavala mava thi lonje utu weya Loi ngoreiya Adam thiye thi vakatha thari na thi kivwala Loi le mbaro.

Adam ngalingaliya iya loloko amba i menename-nako.

¹⁵ Ko iyemaenge Loi le giya bwagabwaga ma ngoreiya Adam le dobu. Emunjoru lolo regha le dobu kaiwae gharighari lemoyo thi mare. Ko

Loi le giya bwagabwaga i laghiye moli na giya bwagabwagako iyako i mena weya lolo regha, iye Jisas Kraisi le mwaewo e tine, i thovuye moli, gharighari lemoyo kaero thi vaidi.

¹⁶ Tembe ngoreiyeva Loi le giya bwagabwaga Une i kivwala lolo regha le thari une. Adam vambe mbanara enge i vakatha thari na Loi i vanivana na i dagewe ina, "Len tharina modae u vaidi." Ko iyemaenge Loi le mwaewo bwagabwaga ngoreiyake: gharighari lemoyo thi vakatha thari, Loi i mwaewo wengi na i dage wengi ina, "Ghemi hu rumwaru."

¹⁷ Na emunjoru lolo regha le thari kaiwae, gharigharike wolaghiye mare i mbaronangi. Ko iyemaenge thavala thi wo Loi le mwaewo riyeriyevanjaraniye na i wovarumwarumwarunangi, thiye ne thi vaidi yawali memeghabananiye na ne thi mbaro weya lolo ghamberegha, iye Jisas Kraisi.

¹⁸ Kaiwae amala regha Adam va i kivwala Loi le mbaro iyaghan gharigharike wolaghiye thiya thari Loi e marae. Na tembe ngoreiyeva i wovarumwarumwarunangiya gharighari, kaiwae iye Kraisi va i ghambugha Loi le mbaro, gharighari wolaghiye valikaiwae thi wo yawali memeghabananiye.

¹⁹ Na kaiwae lolo regha mava i lonweghathigha Loi ghalinae, gharigharike wolaghiye thi tabo thari gharavakatha. Tembe ngoreiyeva, kaiwae lolo regha i lonweghathigha Loi ghalinae, i vakatha gharigharike wolaghiye thi tabo gharighari thiye Loi ne i wovarumwarumwarunangi.

²⁰ Mbanja Mosese le Mbaro i mena, i vakatha thari ma i tabo na laghiye enge. Na othembe gharighari lenji thari i laghiye moli, i vakatha Loi le mwaewo bwagabwaga ma i tabo na laghiye enge moli.

²¹ Othembe thari i vurigheghe na i mbaronangiya gharigharike wolaghiye na thi vaidiya mare, Loi le mwaewo bwagabwaga i vurigheghe moli na i wovarumwarumwarunaina na e yawalinda memeghabananiye weya Jisas Krai iye ghanda Giya.

6

Weya Adam mare ko weya Krai yawali

¹ Iya kaiwae, ngoronga ne rana enge? Mbala mbe valikaiwae moli vara ra rombela thari thanavuniye na mbala i vakatha Loi le mwaewo ma i laghiye enge?

² Nandere moli! Ko ghinda ngoreiya ramare-mare na thari thanavuniye ma ele vurigheghe weinda, ngoronga enge na mbe inanda vara e tine ra yakuyakuwe?

³ Ko ana ma hu ghareghare mbanja ra bapitaiso, iyake i vatomwe ghinda kaero ra tubwe weya Krai Jisas na weinda ra mare na regha?

⁴ Iya kaiwae la bapitaiso e tine weinda Krai ra mare na regha na thi woraweinda e ghabubu, mbala ghandathanavu i togha ngoreiya Ramanda Loi, weiye le vurigheghe na

le vwenyevwenye inja na Kraisi i thuweiru mare e tine.

⁵ Kaiwae thonjo kaero ra tubwewe na weinda ra mare, tembe ngoreiyeva emunjoru ra tubwewe na tembe weindava ra thuweiru mare e tine.

⁶ Kaiwae kaero ra ghareghare, yawalinda teuye weiyekrais thi mare na regha e kros, iyake mbala riwandake ma valikaiwae i rovirigheghe thari thanavuniye ghavakatha, na thava tembaronjainda.

⁷ Kaiwae mbaronja lolo i mare, thari ma i mbaronja loloko iyako.

⁸ Ko thonjo kaero ra mare weinda Kraisi, ra lonweghathi tembene weindava ra yaku,

⁹ ra ghareghare kaiwae Loi va inja Kraisi tembe i thuweiruva mare e tine, ma tembene i mareva. Mare ma tembe i mbaronja.

¹⁰ Kraisi vambe mbaronjara enge vara i mare, na le mareko iyako i vakatha thari thanavuniye ma tembe ele virighegheva mbaronjake wolaghiye. Mbaronjake yawaliko iya i yakunako i womena Loi ghatarawa na ghawovavwenyevwenye.

¹¹ Tembe ngoreiyeva, hu thuwenga ghemi ngoreiyeramare na thari thanavuniye ma ele virigheghe wenga, ko iyemaenge e yawayawalimi na hu yaku na regha weimi Loi kaiwae kaero hu tubwe weya Kraisi Jisas.

¹² Iya kaiwae thava thari thanavuniye i mbaronja riwamina iya ne i marena, na hu ghambugha budakaiya riwamina i nangongi.

¹³ Thava hu vatomweya riwamina nginauye regha weya thari thanavuniye na i vakaiwonja

thari e ghavakavakatha. Ghemi va ramare-mare, ko iyemaenge Loi kaero i giya yawalimi, iya kaiwae hu vatomwenga weya Loi, na hu vatomweya riwamina nginauye wolaghiyewe i vakaiwoŋa thovuye e ghavakatha.

¹⁴ Ma valikaiwae thari thanavuniye i mbaroŋa yawalimina, kaiwae ma hu yaku Mbaro e raberabe, ko iyemaenge kaero hu yaku Loi le mwaewo bwagabwaga e tine.

Rumwaru gharakakaiwobwaga kaiwae

¹⁵ Ngoroŋa enge? Valikaiwa mbe ra vakavakatha vara thari, kaiwae ma inanda Mbaro e raberabe ko kaiwae kaero inanda Loi le mwaewo raberabe? Nandere moli!

¹⁶ Ko ana ma hu ghareghare thongo hu vatomwenga weya lolo regha na hu ghambugha le renuwaŋa, ghemi ngoramiya loloko iyako le rakakaiwobwaga? Valikaiwami hu vatomwenga thari thanavuniye e tine, ne le ghambako mare, o hu vatomwenga weya Loi na i vakathanga ghamwami vanaora weimi.

¹⁷ Ra vata ago weya Loi, kaiwae ghemi va thari thanavuniye gharakakaiwobwaga, ko iye-maenge mbanake iyake e gharemina laghiye va hu ghambugha emunjoruko iyava thi vav-agharenako e ghemi.

¹⁸ Loi kaerova i rakayathunga thari thanavuniye e tine na mbanake iyake kaero hu tabo thanavu thovuye gharakakaiwobwaga.

¹⁹ Rakakaiwobwaga gamba thuwathuwa ya wo gharighari e la vakatha, kaiwae lemi gharegharena i vuyowo. Va mbanja regha hu vatomweya riwamina i tabo rakakaiwobwaga

wenjiya mbighi na thari thanavuniye, ko mbanjake hu vatomweya riwamina i tabo rakakaiwobwaga wenjiya thovuye na iyake i vakatha thanavu rumwarumwaruniye e tinemina.

²⁰ Mbanja ghemi thari thanavuniye gharakakaiwobwaga, va e mbanjako iyako thovuye mava i mbaronja yawalimina.

²¹ Uneya thovuye budakai va hu vaidi mbanjaniye hu vakavakatha bigibigiko thiyako iya noroke i vakathanga na hu monjinana? Bigibigiko thiyako unenjiya mare.

²² Ko iyemaenge e mbanjake iyake Loi kaero i rakayathunga thari thanavuniye e tine na hu tabo Loi le rakakaiwobwaga. Iyake une i bigirawenga le gharighari boboma, na ele ghambako hu vaidiya yawali memeghabananiye.

²³ Kaiwae thari thanavuniye modae i woveinda mare, ko iyemaenge Loi i mwaewo weinda na i giya weinda yawali memeghabananiye, kaiwae ra yaku weya Krais Jisas, iye ghandu Giya.

7

Ghamba thuwathuwa ghe ele valivanga

¹ Lo bodaboda, mbwana kaero hu ghareghareya iya budakaiya ne ya utunake, kaiwae taulaghina ghemi hu ghareghare mbaro. Mbaro mbe i mbaronangi enge gharighari e yawayawalinji.

² Ghamba thuwathuwa regha ngoreiyake: mbaro inja ragheghe wevo mbe i tubwe weya vara le ghimoru mbanja ghimoruko mbe e yawayawaliye. Ko thonjo leghimoruko kaero i

mare, gheko ghambaro ma tembe i laweghathiva wevoko.

³ Iya kaiwae thongo wevoko iyako kaero i vanjguva ghimoru regha, mbanja leghimoruko amba e yawayawaliye, kaero mbaro inja iye rayathiyathima. Ko thongo le ghimoru kaero i mare, ghe ghambaro kaero ma i laweghathi. Thongoma i vanjguva ghimoru regha kaero ma i yathima.

⁴ Lo bodaboda, ghemi tembe ngoreiyeva iyako. Krais le mare e tine yawalimina teuyena kaero i mare na Mbaro ma tembe i laweghathingava. Mbanjake kaero hu yaku weya loloko iya Loi va i vakatha na tembe i thuweiruva mareko e tine, na yawalinda mbala e uneune Loi kaiwae.

⁵ Kaiwae mbanja mbunima na madibe lenji renuwana i mbaronjainda, Mbaroko i vovairingiya thari renuwaniye e riwandake tine, mbalava la vakatha une i yomara mare.

⁶ Ko iyemaenge mbanjake Loi kaero i rakayathuinda Mbaro e tine. Krais le mare e tine yawalinda teuye kaero i mare iyava i laweghathiindake. Iya kaiwae la kaiwo weya Loi ma ngoreiya Mbaro i vakatha na ra kaiwo, ko iyemaenge ra goruwe kamwathiko toghako iya Nyao Boboma i vaghareindako.

Mbaro na thari lenji kaiwo utuniye

⁷ Ngoronga ne rana? Mbaro iye i thari? Nandere moli! Mbaro iye i worangiya thari thanavuniye e ghino ko amba ya ghareghare budakaiya thari. Mbala mava ya ghareghare

budakaiya maralogheloghe thonjo Mbaro ma inja, “Tha ghamaralogheloghe.”

⁸ Ko iyemaenge thari i vaidiya le kamwathi regha, na mbaroko iyako e tine i ndana ghavorighewe ko amba i vovaira maralogheloghe ghaminaeko wolaghiye e ghino. Thonjo ma mbaro, thari ma ele vurigheghe.

⁹ Va ya yakuna ma ya ghareghare budakai mbaro nuwaiya, ko iyemaenge mbanja ya ghareghare mbaroke iyake iya injake tha u maralogheloghe, mbanjake ya ghareghare ya kivwala mbaroko iyako

¹⁰ na ya ghareghare ya meghaghathi weya Loi. Na ghino lo ghareghare e tine ya vaidi mbaroko iya mbala i vakathango na e yawayawalingu, iyemaenge i womenava mare.

¹¹ Kaiwae thari i vaidiya le kamwathi mbaro e tine, i vakaiwona mbaroko iyako, i yarongo na ya marewe.

¹² Iya kaiwae Mbaro i boboma, na e tineko mbaroko iyako i boboma, i rumwaru na i thovuye.

¹³ Na ngoronga, ko ana mbaroko iyako iye bigi thovuye i vakathango na ya mare? Nandere moli! Ko iyemaenge thari i vakaiwona bigi thovuye ko amba i vakatha lo ghamba mare, na iyake kaiwae amba gharighari thi ghareghare wagiya we thari le vakatha moli. Mbaroko iyako i manjamanjalawe thari iye bigi raithari moli.

Thovuye na thari lenji vakatha utuniye

14 Ra ghareghare Mbaro righe moliya Loi Une; ko ghino ya ghangowa mbunima na madibe lenji renuwana, na ghino kaero thari le rakakaiwobwaga.

15 Ma ya ghareghare budakaiya ya vakavakatha. Kaiwae budakaiya nuwanguiya ya vakatha, ma ya vakatha, ko iyemaenge budakaiya ya botewoyathu, iya ya vakavakathake.

16 Na thongo ya vakatha budakaiya ma nuwanguiya ya vakatha, elo ghareghareke tine ya varaena mbaro iye i thovuye.

17 Ma ghino moli wombereghake iya ya vakathangiya vakathake thiyake, ko iyemaenge tharike iya i yaku e gharenguke iya i vakathangike.

18 Ya ghareghare thovuye ma i yaku e ghino, ghino rameyambane. Kaiwae othembe nuwanguke nuwaiya ya vakatha thovuye thanavuniye, ma valikaiwangu ya vakatha.

19 Thovuyeko iya nuwanguiya ya vakathako, ma ya vakathava iyemaenge thariko iya ya botewoyathuko iya ya vakavakathake.

20 Thongo budakaiya ya botewoyathu na ya vakatha, ma ghino moli wombereghake ya vakathangiya vakathake thiyake, ko iyemaenge tharike iya i yaku e gharenguke, iya i vakathangike.

21 Kaero ya njimbuvaiddi budakai i yoyomara e ghino. Mbanu nuwanguiya ya vakatha thovuye, thari mbe ina vara evasiwangu na ya vakatha.

22 E gharenguke ya gharethovuja laghiye Loi le mbaro,

²³ ko iyemaenge ya ghareghare mbaro regha mbe inawe i kakaiwo e riwanguke, weiye gharenguke le mbaro moli thi wogaithi. Thari le mbaro iya i kakaiwo e riwanguke i vakatha le rakakaiwobwaga ghino.

²⁴ Aleu! Mbema lolo nuwanuwathariniye vara ghino! Thela ne i vamorungo e ririwoke iyake tine, ririwoke iya i womenango mareke e tine?

²⁵ Ya vata ago weya Loi iye i wovaghang; na ghandi Giya Jisas Kraisi vamboromboro. Ngoreiyake. Ghino ngorangoke. Mbe ghino vara wombereghake ya kaiwo weya Loi le mbaro mbe ngoreiye vara lo renuwana, ko e nuwanguke ghino mbaro gharakakaiwobwaga, iya une mare.

8

Yawali i mena weya Nyao Boboma

¹ Iya kaiwae, e mbanjake iyake, ghinda kaero ra tubwe weya Kraisi Jisas, Loi mane i lithi weinda la thari kaiwae.

² Kaiwae Nyao Boboma i giya yawali weinda i mbaronjainda na i rakayathuinda na thari na mare ma tembe thi mbaronjaindava.

³ Kaiwae budakai Mbaro ma valikaiwae i vakatha, kaiwae mbunima na madibe thi njavovo, Loi va i vakatha. Va i variya Nariye na i mena, riwae ngoreiya thari gharavakatha ririwoniye. Va i mena na i mare la thari modae, Loi i vakatha thari ma ele vurigheghe.

⁴ Loi i vakatha ngoreiyako mbala mbanjake valikaiwae ra vamboromboro bigibigiko wolaghiye Mbaroko nuwaiya. Iyake ma kaiwae

ra ghambugha mbunima na madibe lenji renuwaṅa, ko iyemaenṅe ra ghambugha Nyao Boboma le renuwaṅa.

⁵ Thavala thi goru weya mbunima na madibe lenji renuwaṅa, mbe thi rerenuwaṅa enṅe bi-gibigiko iya mbunima na madibe nuwanjiyako kaiwae, ko thavala thi ghambugha Nyao Boboma le renuwaṅa, mbe thi rerenuwaṅa enṅe bi-gibigiko iya Nyao Boboma nuwaiyako.

⁶ Thela thonṅo le renuwaṅa i ghambugha mbunima na madibe, le ghambako mare, ko thonṅo thela i ghambugha Nyao Boboma, le ghambako ne i vaidiya yawali memeghabananiye na le yakuyaku i thovuye.

⁷ Iya kaiwae, thonṅo lolo regha i ghambugha mbunima na madibe lenji renuwaṅa, iye kaero ṅoreiya Loi ghathighiya, kaiwae ma i ghambugha Loi le mbaro, na ma valikaiwae moli i ghambu.

⁸ Thavala thi ghambugha mbunima na madibe ma valikaiwae thi vawarariṅa Loi.

⁹ Na ghemi ma mbunima na madibe thi mbaronṅa, ko iyemaenṅe kaero Nyao Boboma i mbaronṅa, thonṅo Loi Une i yaku e ghemi. Thela thonṅo Krai Une ma inawe, iye ma Krai le wabwi loloniye ṅoreiye.

¹⁰ Othembe mbunima na madibe ririwoniye i mare kaiwae thari i lawe, ko iyemaenṅe thonṅo Krai ina e ghemi unemina yawali mbe inawe kaiwae Loi kaero i wovarumwarumwarunṅa.

¹¹ Na thonṅo Loi Une ina e ghemi, iyava i vakatha Jisas na tembe i thuweiruva mare e tine, amalaghiniyeko iyako iyava i vakatha

na Kraisi tembe i thuweirukova, iye nevole i vakathava riwamina tembe i thuweiruva mare e tine, kaiwae Une ina i yaku e ghemi.

¹² Iya kaiwae, lo bodaboda, valikaiwae moli yawalinda ghayakuyaku ngoreiya Nyao Boboma le renuwana, na thava yawalinda ghayakuyaku ngoreiya mbunima na madibe lenji renuwana.

¹³ Kaiwae thonjo yawalimina ghayakuyaku i ghangowa mbunima na madibe lenji renuwana, ne hu mare. Ko thonjo Nyao Boboma le vurigheghe e tine, na hu tagavamare moliya mbunima na madibe lenji vakatha rarithari, ne hu vaidiya yawali memeghabananiye.

¹⁴ Thavala Loi Une Boboma i viva wengi, thiye Loi le ngamangama.

¹⁵ Kaiwae Nyaoko iya Loi i giyako e ghemi ma i vakathangana rakakaiwobwaga na valikaiwae hu mararu, ko iyemaenge i vakathangana ghemi Loi le ngamangama. Na Nyaoko iyako le vurigheghe e tine ra kula voro weya Loi, rana, "Bwebwe! Bwebwe!"

¹⁶ Loi Une weiye ghinda unenda thi dage na regha na thi vaemunjoruna ghinda Loi le ngamangama.

¹⁷ Iya kaiwae, kaiwae le ngangga ghinda, Loi le mwaewoko iyava i vivatharaweko Kraisi kaiwae iye nariye, nevole ra wo na regha weinda. Kaiwae ra viri weinda Kraisi, mbala weindava ra yaku ele vwenyevwenye tine.

Mbana i menamenako ghavwenyevwenye kaiwae

¹⁸ Elo ghareghare ya njimbuvaide ngoreiyake: vuyowoke iya kaero ra vavaide mbanake

iyake, ma valikaiwae ra vamboromboro weiye wwenyevwenyeko iya nevole Loi i wogiyako weinda, kaiwae wwenyevwenyeko iyako i laghiye moli.

¹⁹ Loi le vakavakathake wolaghiye gharenji i tageja na thi roroghagha ne i woranjiya le nganga lenji wwenyevwenye.

²⁰ Loi le vakavakathako wolaghiye va i vakathangi na ma valikaiwae thi vamboromboro ngononga le renuwanako. Ma rana kaiwae mava nuwanjiya thi vakatha ngoreiyako, ko othembe iyako Loi va i vakathangi na ngoreiyako, kaiwae va nuwaiya weiye lenji gharematuwa thi ghimaraghaoko e ghamwanjiko,

²¹ nevole mbanja regha i rakayathungi mare na vwatha e tine na weiyangiya amalaghiniye le nganga thi wwenyevwenye.

²² Kaiwae kaero ra ghareghare, bigibigike wolaghiye iya Loi va i vakathangiko, i mena ghaghad mbanake, viri kaiwae thi yawaru, ngoreiya ngama ghambanja viri na viriniye.

²³ Ko iyemaenge ma mbe thiye enge thi viri vakavakathangi kaiwanji, ghinda tembe ngoreiyeva gharenda i viri. Ghinda kaero ra wo Nyao Boboma iye Loi le dagerawe une iviva moli, iya kaiwae ra roroghagha nevole Loi i vatoghana riwandake na i vanjunda le nganga ghinda.

²⁴ Loi kaero va i vamoruinda iya kaiwae weinda la gharematuwa ra roroghagha ne mbanja i vawwenyevwenyenjanda. Thongo kaero ra thuwe e maranda budakaiya kaero ra thuwe e maranda, mane weinda la gharematuwo ra roroghagha. Thela kaero i thuweya bigi e

marae na mbe i roroghagha vara kaiwae?

²⁵ Ko ghinda budakaiya amba ma ra thuwe e maranda, gharenda i matuwo kaiwae, iya kaiwae weinda la ghatanaghathi ra roroghagha kaiwae.

²⁶ Tembe ngoreiyeva, Nyao Boboma i thalavuinda e la njavovo tine. Kaiwae ma ra ghareghare mbala ra nanjo weya budakai, ko weinda gharenda le randa na the ututu ma valikaiwanda, Nyao Boboma i nanjo kaiwanda.

²⁷ Loi iye i ghimaraghathara gharenda na i ghareghare Nyao Boboma le nanjo gharumwaru, na i ghareghare Nyao Boboma le nanjo ghinda le gharighari kaiwanda ngoreiye amalaghiniye nuwaiya.

²⁸ Na ra ghareghare thiye thavala thi gharethovu Loi amalaghiniye ne i vakaiwona bigibigike wolaghiye na ghanjithovuye kaiwae. I vakatha iyake thavala i kula wenji kaiwae va nuwaiya kaiwanji.

²⁹ Kaiwae thavala va i vivako Loi i ghareghare kaero i tuthingi, i vakatha na thi tabona ngoreiya amalaghiniye Nariye, mbala Nariyeko iyako oghaghae lemoyo na iye gamau.

³⁰ Na thavala va i tuthingi, i kula vathangi; na thavala i kula vathangi i wovarumwarumwarunangi. Na thavala i wovarumwarumwarunangi, i wovavwenyevwenyenanji.

Loi le gharethovu iye Krai Jisas

³¹ Ngoronga ne raṅa bigibigi ṅoranjiyako kaiwanji? Thongo Loi iye kaiwanda, thela ne valikaiwae i kivwalainda? Nandere moli!

³² Loi mava tembe i vimbiyeva Nariye moli, ko iyemaenḡe va i vatomweyathu taulaghike ghinda kaiwanda. Na ra ghareghare wagiya we kaero i vatomweya Nariye kaiwanda, iya kaiwae tembene i giyava weinda bigibigike thovuthovuye wolaghiye ghandamwaewo.

³³ Thela ne i vakatha ghandawonjowe regha, ghinda Loi le tututhi gharighariye? Nandere moli, kaiwae Loi iye ghamberegha i wovarumwarumwarunainda.

³⁴ Thela ne i wovatharitharinainda? Nandere moli, kaiwae Krai i mare, na kaero i thuweiruva mbanake i wo ghamba mbaro weya Loi valivanḡa e uneko i nanḡonḡo vurigheghe kaiwanda.

³⁵ Thare bigi regha valikaiwae ne i kiteniyathuinda Krai ele gharethovu tine? Ne vuyowo, o viri. Ghatana viri, o bada ghe mbanḡa, o mbinyembinyenḡu, o thari tine, o mare?

³⁶ Ngoreiya Buk Boboma le woranḡiya, inḡa, “Ghen idan kaiwae mbanake wolaghiye gharighari nuwanjiya thi gaboime. Gharighari thi numotena ggame na ṅorameya sip ne thi gabonḡi.”

³⁷ Ko iyemaenḡe bigibigiko wolaghiye thiyako e tinenji, ghinda ra kivwala moli, kaiwae thela iya i gharethovunḡaindako i thalavuinda.

³⁸ Kaiwae ya ghareghare wagiya we ma tembe bigi reghava ne i kiteniyathuinda le gharethovu

e tine, othembe mare o yawali, othembe nyao thovuthovuye o nyao rarairithari, othembe bigibigi mbanjake iyake thi yomara o bigibigi ne thi yomara mbanja i menamenako o vurigheghengi, ³⁹ othembe bigibigi inanzi yavoro e lughawoghawoko o e yambaneke raberabe, othembe bigibigike wolaghiye iya Loi va i vakathangike, ma tembe regha ne i kiteniyathuindava Loi ele gharethovu tine, iya ra vaidi weya Krai Jisas ghanda Giya.

9

Loi na le tututhi gharighariniye

¹ Ghino ya yaku weya Krai, na lo utuutuke iyake i emunjoru, na ma ya kwan. Na weya Nyao Boboma gharengu i matuwo na ma ya kwan.

²⁻³ Emunjoru nuwangu i thari weiye lo ghareviri laghiye moli, ma ne iko, kaiwae lo gharighari Isirel mane thi wovatha Krai iye ravamoruko Loi va i dageraweko. Iya kaiwae, kaiwae ma thi wovatha Krai, valikaiwae ya vatomwengo weya Loi na i gurango moli na i kiteniyathungo weya Krai thongo ma i vakatha lo vali Isirel thi lonweghathi.

⁴ Thiye Isirel Loi le tututhi gharighariniye. Ija le ngamangamangi, i vatomwe le vwenyevwenye manjamanjalawae wengi, thi vedagerawe wengi, i giya Mbaro wengi, i vatomwe na thi kururuwe na tembe i dageraweve bigibigi lemoyo wengi.

⁵ Thiye orumburumbume Eibraham, Aisake na Jeikob orumburumbunji, na Krai tembe

ngoreiyeva orumburumbuye, iye Loi bigibigike wolaghiye ghanji Rambarombaro. Ra tarawenja idae mbanake wolaghiye. Mbwana. Ngoreiye.

⁶ Ko othembe lo vali Isirel gharighariniyeko laghiyeniye moli thi botewoyathu Krais, iyake ma i vaemunjorunja Loi kaero ma i vamboromboro budakaiya va i dagerawe wenjiya Eibraham, Aisake, na Jeikob, iyava injake orumburumbunjiko wolaghiye nevole thi vaidiya Loi le mwaewo. Ko ngoronja, Loi ma valikaiwae i vamboromboro le dageraweko wenjiya Jiu? Nandere. Kaiwae ma i ghanagha moli thiye Jeikob orumburumbuye na thiye thiya idanji Jiu, thiye Loi le renuwana na thiye le gharighari emunjoru.

⁷ Na tembe ma ngoreiyeva Eibraham orumburumbuyeko wolaghiye thiye orumburumbuye molingi. Loi va i dagewe Eibraham inja, "Orumburumbu va ya dagerawe kaiwan ne thi raka-mena weya Aisake."

⁸ Utuutuke iyake i govambwara weinda ma i ghanagha moli thiye thi viri Eibraham orumburumbuyeko thi tabo Loi le ngamangama, ko iyemaenge Eibraham orumburumbuye molingi iya thavala thi rakarangima Loi le dageraweko e tine.

⁹ Loi le dagerawe weya Eibraham inja ngoreiyake, "Ne e mbanake vara iyake theghatheghake i menamenake, ya njoghama na Sera i ghamba ngama ghimoru."

¹⁰ Na tembe ngoreiyeva, Rebeka va i ghambinjigiya gamwaruworuwo, na ramanji

mbe reghaenge, iye rumbunda Aisake.

¹¹⁻¹² Gamagaiko thenjighewoko, Iso iye viriviva, na Jeikob iye virireghamba, amba mava thi yomara na amba mava thi vakatha mun thovuye o thari, kaero Loi i dage weya Rebeka, inja, “Viri viva ne i tabo rakakaiwo weya viri reghamba.” Loi va i utu ngoreiyako na i vaghareinda gamagaiko thiyako regha kaero i tuthi, mbe ghamberegha vara le renuwana ngoreiye. Loi le tututhi righe, ma kaiwae Jeikob va i vakatha bigi regha thovuye, ko kaiwae ghakula vambe i mena weya Loi ngoreiyako.

¹³ Buk Boboma regha i govambwara tembe ngoreiyeva iyako, inja, “Ya gharethovu Jeikob, ko ya botewoyathu enge Iso.”

¹⁴ Ngoronga ne rana? Rana Loi le vakatha ma i vamboromboro? Nandere moli.

¹⁵ Kaiwae i dage weya Mosese inja, “Thela thonngo ya tuthi, ya ghareviri kaiwae, na thela thonngo ya tuthi, gharengu i njawe.”

¹⁶ Iya kaiwae Loi le tututhi ma kaiwae nuwanjiya i tuthingi o kaiwae thi vavurigheghe na i tuthingi, ko iyemaenge mbe i goruwe enge vara ghamberegha le ghareviri e tine.

¹⁷ Na Buk Boboma e tine Loi i dage weya Pero inja, “Ya tuthinge na u tabo kin, kaiwae nuwanjiya gharighari thi thuweya lo vurigheghe e ghen, na valikaiwae idangu i lalo yambaneke laghiye.”

¹⁸ Iya kaiwae, thonngo Loi nuwaiya i ghareviri lolo regha kaiwae i ghareviri kaiwae, na thonngo

nuwaiya i vakatha lolo regha ghare i vurigheghe, i vakatha na ghare i vurigheghe.

¹⁹ Ghemi regha ne i dage e ghino na inja, “Buda kaiwae Loi mbe i wonjoweinda? Thela valikaiwae ne i botewo budakaiya Loi nuwaiya?”

²⁰ Ko thela idaya ghen, mau, na u munjeva u gonjogha weya Loi? Valikaiwae monjemonje biginiye i dage weya ramonjemonje na inja, “Buda kaiwae u monjengo na ngorangwake?”

²¹ Ramonjemonje tembe ghamberegha, budakaiya nuwaiya i vakatha valikaiwae i vakatha. Valikaiwae i thina thelau wabura na i vakatha uye vwaraiwowe, vwarara i vakaiwoŋa bobwari kaiwanji, na vwarara i vakaiwoŋa nja kaiwae.

²² Othembe iye valikaiwae i vatomwe wenjiya gharighari le gaithi thari kaiwae na valikaiwae i lithi vurigheghe gharighari thiye thi vakatha le gharegaithi, iyemaenge mbaŋa molao Loi i ghatanaghathinji thiye thi vakatha le gharegaithi na thiye ghanjirighe mukuwo.

²³ Va i ghatanaghathi kaiwae nuwaiya gharighari thi thuweya le vwenyevwenye riyeriyevanjaraniye. Le vwenyevwenyeko iyako i linji weinda ghinda mbaŋa va i vivako i vivathanjainda na ra woya le vwenyevwenyeko.

²⁴ Kaiwae ghinda Loi va i kula weinda, na ma mbe ghinda enge Jiu e tinenda, ko tembe ngoreiyeva thiye ma Jiu gharighariniye e tinenji.

²⁵ Loi ghalinae buk Hoseya i woranjiya inja ngoreiyake:

“The gharighari va yaŋa ma lo gharighari ngoreiye

ne yaṅa, 'Lo gharigharingi.'
 The vanautuma va yaṅa ma gharenḡu wenḡi
 ne yaṅa, 'Kaero ya gharethovu.'

²⁶ Na ghembako iyako wenḡi yaṅa,
 'Ghemi ma lo gharighari ṅgoreiye,'
 e ghembako iyako tine ne yaṅa,
 'Ghemi ghino Loi vurivurighegheniye moli
 lo ṅganḡa ghemi.' "

²⁷ Na Isirel kaiwanji Aiseya iṅa, "Othembe Isirel gharighariniye lenji ghanaghanagha ṅgoranjiya kerakera e njighiko, iyemaenḡe mbe thegheviye enḡe ne thi vaidiya vamoru,

²⁸ kaiwae Loi ne ele ghathaghatha ghambaṅa ne i vamaṅa na i lithi wenḡiya gharigharike wolaghiye e yambaneke."

²⁹ ṅgoreiya Aiseya mbaṅa me vivako le utuutu iṅa, "Thonḡo Loi Vurivurighegheniye Moli mava i vatomweya orumburumbunda vavana na mbe thi royakuyaku, ghinda mbala ṅgorandaṅiya Sodoma na Gomora."

Isirel ma thi loṅweghathi

³⁰ ṅgoronḡa ne raṅa? Thiye ma Jiu gharighariniye mava thi rovirighegheṅa thi mando na thi thovuye Loi e marae, ko iye-maenḡe Loi tembe i wovarumwarumwaruṅḡi kaiwae thi loṅweghathi.

³¹ Ko thiye Isirel thi rovirigheghe Mbaro e tine mbala Loi i wovarumwarumwaruṅḡi kaiwae thi ghambu Mbaro, ko iyemaenḡe ma valikaiwanji.

³² Kaiwae ma thi varemija Loi ne i vakatha kamwathi na i wovarumwarumwaruŋangi, ko iyemaenŋe lenji vakathako thovuye iyako thiŋa Loi i wovarumwarumwaruŋangi. Thi tagandinda ghenji e vari na thi dobu,

³³ ŋgoreiya Buk Boboma i woraŋgiya Mesaiya kaiwae iŋa,

“Wo u thuwe, ya woraweya vari Saiyon,*
gharihari thi tagandinda ghenji e varike iyake na thi dobu.

Ko iyemaenŋe thela i lonweghathigha amalaghiniye
mane i monjina.”

10

¹ Lo bodaboda, e gharenguke weiye lo nango weya Loi, nuwaŋgiya moli Isirel thi vaidiya vamoru.

² Ya dage emunjoru e ghemi thiye thi rovirigheghe laghiye na nuwanjiya moli thi ghambugha Loi, ko iyemaenŋe ghakamwathi moli ma thi ghareghare.

³ Ma thi ghareghare e the kamwathi na Loi i wovarumwarumwaruŋa lolo, iwaenŋe tembe ghanjimberegha thi vakatha lenji kamwathi. Ma thi goru weya iya kamwathiko Loi le renuwanako ŋgoreiye na i wovarumwarumwaruŋa lolo, thi botewoyathu.

⁴ Ko iyemaenŋe Kraiŋ kaero i vakathavao Mbaro ŋgoronŋa gharerenuwana, iya kaiwae gharigharike wolaghiye thavala

* **9:33** Saiyon i mboromboro weiye Jerusalem. **9:33** Ais 8:14; Ais 28:16

thi lonweghathigha amalaghiniye, Loi i wovarumwarumwarunangi.

⁵ Mbaroko ghakamwathi iya e tine na ra rumwaru Loi e marae utuniye Mosese va i rorinjona ngoreiyake: “Thongo lolo regha i vakatha ngoreiya Mbaro le renuwana, Mbaroko i vakatha na i vaidiya yawaliye.”

⁶ Ko iyemaenge thongo lolo regha i rumwaru Loi e marae kaiwae le lonweghathi valikaiwae ina ngoreiya Buk Boboma inake: “Thava u renuwana e gharena una, ‘Thela ne i voro e buruburu?’ ” Iyana gharumwaru lolo regha wo ve wo Kraisi i wonjama e yambaneke.

⁷ “Na thava una, ‘Thela ne ve nja e ndavarake?’ ” Iyana gharumwaru lolo regha wo ve wo njogha Kraisi na e yawayawaliyeva.

⁸ Ko iyemaenge valikaiwae Kraisi le ralonwelonweghathi regha valikaiwae ina ngoreiya Buk Boboma le worangiyake: “Loi le utuutu mbe ina vara evasiwan, ina e ghaena njimwa na ina e gharena.” Totoko iya inako mbala u lonweghathi Kraisi iya utuniya wo vavagharenako, ngoreiyake

⁹ thongo e ghaena njimwa una, “Jisas iye Giya,” na u lonweghathi e gharena Loi va i vanuthuweiruva e mare tine, ne u vaidiya vamoruru.

¹⁰ Kaiwae mbanja u lonweghathi e gharena, Loi i wovarumwarumwarunange, na mbanja u uturangiya e ghaena na una Jisas iye Giya, Loi ne i vamorunge.

11 Ngoreiya Buk Boboma le utuutu iṅa, “Thela thoṅgo i loṅweghathi amalaghiniye mane i monjina.”

12 Gharigharike wolaghiye utuninjiya iyako, kaiwae thiye Jiu na ma Jiu gharighariniye ngoreiye ma thi tomethi. Giya mbe ghambereghaenge taulaghike ghanji Giya na iye gharigharike wolaghiye iya thavala thi nangowe i mwaewo wenḡi laghiye moli.

13 Kaiwae Buk Boboma iṅa, “Thavala thoṅgo thi nanḡo weya Giya thalavu kaiwae ne thi vaidiya vamoru.”

14 Ko ne ṅgoronḡa enḡe na thi nanḡo weya Loi thoṅgo ma thi loṅweghathi? Na ne ṅgoronḡa enḡe na thi loṅweghathi thoṅgo ma thi loṅweya toto thoṅgo ma toto gharayathu i utuṅa wenḡi?

15 Na toto gharayathu ne ṅgoronḡa enḡe na thi utuṅa thoṅgo ma thi variyenḡi na thi ranḡi? Ngoreiya Buk Boboma le woranḡiya iṅa, “Toto Thovuye gharayathu lenji mena i warawarari.”

16 Ko iyemaenḡe ma Isirel taulaghiko thi loṅweghathigha Toto Thovuye na thi worawe e gharenji. Aiseya iṅa, “Giyana, thela i loṅweghathigha lama utu?”

17 Iya kaiwae loṅweghathi i yomara thoṅgo thi loṅweya utuutu, na thi loṅweya toto thi utuṅa Kraiḡ utuutuniye.

18 Ko ya vaito, “Mbema emunjoru thi loṅweya toto?” Ko mbwana ngoreiye, kaero thi loṅweya toto, ngoreiya Buk Boboma iṅa,

“Ghalinjanji kaero i ranji na i wa e yambaneke laghiye,
na lenji utuutu kaero i ranji na i wa vewo yambaneke laghiye na ghaghad.”

¹⁹ Mbowo ya vaitova: “Ko ana Isirel thi wo totoko gharumwaru?” Ngoreiye, i viva Loi le utuutu Mosese va i rori ngoreiyake:

“Ne ya vakatha na hu yamwanja gharighariko thavala ma lo gharighariko,
na ne ya vakatha na hu gaithi wenjiya gharighari thavala unounonji.”

²⁰ Na Aiseya weiye le gharematuwa tembe i rorinjonava Loi le utuutu, ina ngoreiyake:

“Thavala ma thi tamwenjo
kaero thi vaidingo,
na thavala ma thi vavaito kaiwanju
kaero ya yomara wenji.”

²¹ Na thiye Isirel utuninji Loi ina, “Mbanja molao va ya yalivaoro nimangu lo gharighari wenji na ya munje ya vangunji, ko iyemaenge ma thi lonweya ghalinangu na thi ndeghereiye wanango.”

11

Loi le mwaewo wenjiya Isirel gharighariniye

¹ Na mbowo ya vaitova, “Mbema emunjoru Loi i botewoyathunjiya le gharighari?” Nandere moli! Hu thuwenjo! Ghino Isirel loloniye regha, Eibraham rumbuye, na ya mena Benjamin ghauu e tine.

² Va i rikowe Loi kaerova i tuthingiya wabwi Isirel na le gharighari, na ma i botewoyathungi. Buk Boboma le utuutu kaero hu ghareghare Ilaija utuniye. Ilaija i utu vurigheghe weya Loi, Isirel kaiwanji, inja,

³ “Giya, kaero thi gabongiya ghalinan ghaurautu, na ghamba vowo ghen kaiwan thi tagarakarakanji. Mbema wombereghe enge vara ya reyaku, na nuwanjiya tembe thi unighingova.”

⁴ Na ngononga Loi le thombe weya Ilaija? Inja ngoreiyake: “Kaerova ya tuthingiya lo gharighari, lenji ghanaghanagha saven tausan, na thiye ma mbanja regha thi kururu weya loi Baal.”

⁵ Tembe ngoreiyeva noroke, wabwi nasiye Isirel e tine kaero i tuthingi le mwaewo bwagabwaga e tine.

⁶ Thongo le mwaewo bwagabwaga e tine na i tuthingi, ma thiye lenji vakatha thovuye kaiwae na i tuthingi. Thongo ngoreiyako, mbala iya le mwaewoko ma ngoreiya mwaewo bwagabwaga.

⁷ Na iya ngononga? Isirel gharighariniye thi rovurigheghe laghiye moli nuwanjiya thi thovuye Loi e marae, ko iyemaenge ma thi vaidi. Ko e tinenji iya thavala kaerova i tuthingi thiye thi vaidi. Vavanako gharenji va i vurigheghe na ma thi lonjweya ghalinae,

⁸ ngoreiya Buk Boboma le utuutu inja,
 “Loi i vakathanji ngoreiya
 unenjima i ghawe,

i giya maranji ko iyemaenḡe ma
 valikaiwanji thi thuweya bigi regha,
 na i giya yanawanji ko iyemaenḡe ma
 valikaiwanji thi loḡweya bigi regha.

Mbe ḡgoraenḡe vara iyako ḡhaghad noroke.”

⁹ Na Deivid tembe iḡa weva Loi,

“U ḡheneviyathu na thi wona e lenji thaga na thi
 dobu na u lithi wenḡi.

¹⁰ Mbala thava thi thuweya bigi regha,
 ko iyemaenḡe maranji i momouwo,
 na ḡhanjivuyowoko i rovarivarinḡi
 mbanake wolaghiye.”

Loi ne i vanḡunḡoḡhanḡiya Isirel

¹¹ Mbowo ya waitova, mbanḡa Isirel thi dobu,
 lenji dobuko iyako thare i vakowanḡi moli?
 Nandere moli! Kaiwae thi dobu une i yomara
 thiye ma Isirel wabwi thi vaidiya vamoru, mbala
 i vakathanḡi Isirel thi yamwanḡa kaiwanji.

¹² Kaiwae mbanḡa Jiu thi botewo Krais une
 i yomara yambaneke laghiye thi vaidiya Loi
 le mwaewo riyeriyevanjaraniye. Na Jiu le
 dobu une i yomara thiye ma Jiu ḡharighariniye
 thi vaidiya Loi le mwaewo riyeriyevanjaraniye.
 Jiu nevole thi vaidiya mwaewo riyeriyevan-
 jaraniye mbanḡa thavala Loi le tututhi kaero thi
 loḡweghathi Krais.

¹³ Wo ya utu e ḡhemi, ḡhemi ma Jiu
 ḡharighariniye. ḡhino wabwina ḡhemina kai-
 wami ya tabo ḡhalinḡae ḡharaghambi, na kai-
 woko iyako ḡharerenuwanḡa i laghiye e ḡhino.

14 Ya rovurigheghe na ya vakatha kaiwo thiye ma Jiu gharighariniye kaiwanji, na mbala i vakatha lo vali Isirel thi thuwe na thi yamwanja kaiwae, na vavana thi vaidiya vamoru.

15 Kaiwae mbanja Loi i botewoyathunji Isirel une i yomara gharigharike wolaghiye e yambaneke thi tabo ghaunengi. Iya kaiwae, kaiwae ne i vanguvathangiva mbanja thi lonweghathi Jisas, une i yomara thiye ngoreiya ramaremare thi thuweiru mare e tine.

16 Ngoreiye bred wolaghiye i boboma thongo vuvura i boboma, na ngoreiye umbwa yangayangae i boboma thongo umbwa watheliliye i boboma, iya kaiwae orumburumbunda e idanji thiye inanjiwe Loi orumburumbunji tembe thiye inanjiweva Loi.

17 Ko othembe Loi kaero i botewoyathunjiya Jiu na thiye ngoranjiya olivi yangayanganga thi bebeyathu e umbwaniyeko, na othembe ghemi ma Jiu gharighariniye Loi kaero i vanguvathenga ngoramiya olivi i mbuthu e njamjam yangayangae thi ten na thi monje e olivi righe, oliviko nikiyeko thovuye ne i valawe e ghemi,

18 iya kaiwae thava hu ghimara njonanjonangiya yangayangae iyava i bebeyathuko. Thongo hu vakatha ngoreiyako, hu renuwana iyake: ghemi yangayanganga ma hu giya thovuye weya righe, ko iyemaenge righe i giya thovuye wenga yangayanganga.

19 Mbwata ghemina regha ne ina, "Ko kaero i bebeyathu yangayangae vavana mbala i monjenjohango e righeko thovuye."

²⁰ Emunjoru, i bebeyathungi kaiwae ma thi lonweghathi, na ghen mbe u tubwewe kaiwae u lonweghathi. Ko iyemaenge tha u sirari, wein enge len mararu u njimbukikinge.

²¹ Kaiwae kaero i numotena olivi yangayangae, na ghen tembe ngoreiyeva ne i numoteninge thonjo ma u vakathambele lonweghathi ghakamwathi.

²² Wo u renuwana Loi le gharemwaewo na le vurigheghe gharighari kaiwanji. Thavala ma thi ghambu ghalinae, i vurigheghe wenji, ko iyemaenge le gharemwaewo wenje thonjo u varemjinjembela le gharemwaewo. Ko iye-maenge thonjo nandere, ghen tembene i kiteniyathungeva.

²³ Na thonjo Isirel thi lonweghathi, ne i tubwenjoghangi weiye amalaghiniye ngoreiye yangayangae i tubweva umbwa, kaiwae Loi valikaiwae i vakatha ngoreiyako.

²⁴ Ma ra kaiwo uma lenji vakatha ngoreiye thi liya olivi i mbuthu e njamnjam yangae na thi monje e umbwako thi njimbukikiko riwae. Ko ghen olivi i mbuthu e njamnjam yangae, Loi i linje na i monjenje e oliviko thi njimbukikiko riwae, iya kaiwae Loi valikaiwae moli ne i vanjungiya Isirel, thiye oliviko thi njimbukikiko, na tembe i monjengiva e righenjiko moli.

Isirel taulaghiko ne thi vaidiya vamoru

²⁵ Lo bodaboda, nuwanjuiya hu ghareghare emunjoruke iyake iya mevivako Loi ma i worangiya na thava hu sirari. Ngoreiyake: e mbanake iyake Isirel vavana

gharenji i vurigheghe na ma nuwanjiya thi loŋweya Loi ghalinae. Ko iyemaenge gharenji le vurighegheko iyako ghaghad raloŋweloŋweghathi thiye ma Jiu e tinenji lenji ghanaghanagha i mboromboro,

²⁶ ko amba Isirel wolaghiyeko thi vaidiya vamoru. Ngoreiya Buk Boboma le woranjiya inja,

“Ravamoru ne i mena Saiyon*,
na iye ne i thavwiyathu Jeikob
orumburumbuye lenji thari.

²⁷ Ne ya vakatha lo dagerawe wengi ngoreiyake: ne ya thavwiyathu lenji thari.”

²⁸ Kaiwae Isirel thi botewoyathu Toto Thovuye thiye ngoranji Loi ghatighiya, na iyake i yomara ghemi ma Jiu lemi thovuye kaiwae. Ko iyemaenge thiye Loi le tututhi gharighariniye, iya kaiwae i gharethovu wengi, kaiwae va i dagerawe wengiya orumburumbunji.

²⁹ Loi ma i viva le renuwana thavala i tuthingi kaiwanji, na le mwaewo wengi mane i won-jogha.

³⁰ Ko ghemi ma Jiu gharighariniye va mbanja regha ma hu ghambu Loi ghalinae, na mbanjake Loi kaero ghare i njawenga kaiwae thiye Jiu ma thi ghambu amalaghiniye ghalinae.

³¹ Mbanjake tembe ngoreiyeva iyako, ma thi ghambu Loi ghalinae, na une i yomara iyake ngoreiya va le ghareviri wenga, tembene i ghareviri wengiva.

* **11:26** Saiyonike iyake gharumwaru Jiu gharighariniye.
11:27 Ais 59:20,21; Ais 27:9; Jer 31:33,34

³² Loi e marae gharigharike wolaghiye ngoranjiya inanji e thiyo tine kaiwae ma thi ghambu ghalinae. I vakatha ngoreiyako kaiwae nuwaiya ghare wenjiya taulaghike.

Loi ghatarawa

³³ O Loi le vwenyevwenye i kaitotowo moli! Le thimba na le ghareghare i dumwaga moli! Ma lolo regha valikaiwae i tamweya le renuwanao tine na i vamanjamanjana! Ma lolo regha valikaiwae i ghareghareya le vakathako gharumwaru!

³⁴ Buk Boboma le utuutu ina,
“Thela i ghareghareya Giya Loi le renuwana?
Thela valikaiwae i utugiyawe ngoronga
ne ina na i vakatha bigi regha?”

³⁵ Thela valikaiwae i giya bigi weya Loi
na ghaghaga, na tene i vamodo njogha?”

³⁶ Kaiwae Loi i vakathangiya bigigigike wolaghiye, i njimbukikingiya bigibigike wolaghiye, na bigibigike wolaghiye amalaghiniye kaiwae mbala ra wovavwenyevwenyena amalaghiniye mbanake wolaghiye, ma ele ghambako. Mbwana. Ngoreiye.

12

Ra vatomweya yawalinda weya Loi

¹ Iya kaiwae, lo valiralonwelonweghathi, kaiwae Loi le vakathako i laghiye moli kaiwami, ya dage vavurigheghe e ghemi. Hu vatomwenaga

weya amalaghiniye ngoreiya ghemi vowo i bobomawe, vowo e yawayawaliye na vowo i warariṅa. Kaiwae Loi le vakatha i laghiye moli kaiwami, kamwathi thovuye mbe iyaenḡe vara iyake hu vakathawe.

² Na thava hu wo yambaneke gharighariniye ghanjithanavu, iyemaenḡe hu vatomwenḡa na Loi i viva ghamithanavuna na i togħa, mbala valikaiwae hu ghareghareya Loi le renuwaṅa kaiwami. Renuwaṅako iyako i thovuye na ma e ghathona mun na amalaghiniye i warariṅa.

³ Kaiwae Loi kaerova i giya wo bebe, na ya dage e ghemi regħa na regħa e wabwina tine, yaṅa: “Thava ghanimbereghana mbe u wovorenḡe na uṅava u laghiye,” ko iye-maenḡe nandere. Ko len renuwaṅana mbe u rugħi vakatha, u gorugoru weya iya ghanibebeko le lagħilagħiye, iya len loṅwegħathina kaiwae na Loi i giyana e ghen.

⁴ Gharighari ghinda riwanda mbe regħa enḡe, ko ḡginauye enḡe lemoyo, na ḡginauko thiyako tomethi lenji kaiwo.

⁵ Ghinda tembe ngoreiyeva, othembe gharighari tomathiya ghinda, ko kaiwae ra varemijje Kraiḡ, ghinda ririwo regħa na regħa na regħa ghinda ririwo ḡginauye. Iya kaiwae thava regħa le vakatha i munjeva i lagħiye kivwalanḡiya għaune vavana.

⁶ Loi le gharemwaewo e tine i giya ghinda regħa na regħa għandabebe, na i vakatha valikaiwanda ra vakatha wagiyaewe bebeko iyako. Thela thonḡo għabebe i utuṅa Loi għaliṅae, mbala i utuṅa wagiyaewe ngoreiya

ghabebeko iya le lonweghathiko le laghilaghiye.

⁷ Thela thonjo ghabebe i reja e thalavu, mbala i thathalavu, na thela thonjo ghabebe i reja e vavaghare, mbala i vavaghare.

⁸ Thonjo regha ghabebe i reja e vavavurigheghe, mbala i giyagiya vavurigheghe. Thonjo regha ghabebe i reja e giya, mbala i giya weiye le renuwanja regha. Thonjo regha ghabebe i reja e randeviva wenjiya gharighari, tembe ghambergha mbala i vatomwe moliwe kaiwoko iyako, na thonjo regha ghabebe i reja i mwaewo wenjiya ranuwathari, weiye le warari mbala i mwaewo wenji.

Gharethovu

⁹ Mbanja hu gharethovu, mbe hu gharethovu emunjoru e gharemina wenjiya ghamunena iya kaiwae tha u kwan. Hu botewoyathu thari ghavakatha, na hu laweghathi thovuye ghavakatha.

¹⁰ Hu vegharethovu wenga regha na regha e lemi wabwina tine ngoreiya ramami na tinami regha. Lemi yavwatatana wenjiya ghamunena mbanjake wolaghiye mbala i kiwala ghamayavwatatana wenji.

¹¹ Tha weimi lemi njavovo, ko iyemaenge hu kaiwo vurigheghe Loi kaiwae weiye lemi gharevatomwe.

¹² Kaiwae weimi lemi gharematuwo hu roroghagha budakai amba i menamena e ghamwamiko, iya kaiwae gharematuwoko iyako i vawararinanga. Mbanja hu vaidiya vuyowo hu ghatanaghati na hu nanjo valanja.

13 Budakai i ghenethavwi wenḡiya Loi le gharighari vavana hu vethalathalavunḡa hu vegiya bigibigi wenḡa. Hu kula vathanḡiya bobwari e lemi ḡolongolona.

14 Hu nanḡo weya Loi na i mwaewo wenḡiya thavala thi giya viri e ghemi. Hu nanḡowe na i mwaewo wenḡi, na thava hu nanḡowe na i guranḡi.

15 Thavala thi warari, weimiyāḡi hu warari na thavala thi randa, weimiyāḡi hu randa.

16 Lemi yakuyaku weimiyāḡiya ghamunena mbala mbe i thovuthovuye vara. Tha hu nemo, ko iyemaenḡe weimiyāḡiya thavala ma e idaidanji hu rabi na regha. Tha ghamim-beregha hu wovorevorenḡa na hu munjeva lemi ghareghare i laghiye.

17 Thonḡo lolo regha i vakatha thari e ghemi, thava tembe hu lithiweva e thari. Hu vakatha budakaiya gharigharike wolaghiye thi renuwanḡa iye vakatha thovuye.

18 Budakaiya thonḡo ghemi valikaiwami hu vakatha na weimiyāḡiya gharigharike wolaghiye mbala hu yakunḡa vanevane.

19 Wouna, thava lemi vakatha ḡgoreiya ghemi raghataghatha na hu lithi ghathari weya thela i vakatha thari e ghemi, ko iyemaenḡe hu viyathu weya Loi na weiye le ghatemuru ne i lithi wenḡi. Kaiwae Buk Boboma e tine Giya Loi inḡa, “Ghino ne ya lithi wenḡi, na lenji thari modae ne ya vakatha wenḡi.”

20 Ko iyemaenḡe inḡava, “Thonḡo ghamithighiya bada i ghari, hu giya

ghaningawe, thonngo mbwa i ghari, hu giya mbwawe, na ne lemi vakatha ngoreiyakowe i vakatha i monjina.”

²¹ Mbanja gharighari vavana lenji vakatha raithari wenga thava i kivwalanga, ko iye-maenge hu kivwalangi lenji vakathako raithari e lemi vakathana thovuye wenji.

13

Ra ghambugha rambarombaro lenji mbaro

¹ Taulaghina ghemi mbala hu ghambugha rambarombaro lenji mbaro. Kaiwae ma rambarombaro regha i yomara bwagabwaga, ko iyemaenge mbe thi mena we enge Loi, na rambarombarona iya thi mbarombarona Loi i bigirawengi.

² Iya kaiwae thela thonngo i botewoyathu rambarombaro lenji mbaro, i botewoyathu budakaiya Loi le tututhi, na thela i vakatha ngoreiyako, kaero tembene ghamberegha ghalithi.

³ Thavala thi vakavakatha thanavu thovuye ma valikaiwae thi mararungiya rambarombaro, ko thavala thi vakavakatha thanavu raraithari thiye enge mbala thi mararungi. Thare nuwamiya hu mararungiya lemi rambarombaro? Iya kaiwae hu vakatha thovuye kamwathiniye na mbala thi tarawenga.

⁴ Kaiwae thiye Loi le rakakaiwo lemi thovuye kaiwae, ko thonngo hu vakatha thari, ghanjimararu mbe ina e ghemi, kaiwae thiye e lenji

righe na valikaiwanji moli thi giya lithi e ghemi. Thiye Loi le rakakaiwo na thi vakatha ngoreiya thiye Loi i variyengi na i vatomweya le ghate-muru thi giya lithi wengiya thavala thi vakatha thari.

⁵ Iya kaiwae valikaiwae moli hu ghambugha rambarombaro lenji mbaro, ma kaiwae enge Loi le lithi mbe inawe ko kaiwaeva kaero hu ghareghare budakaiya Loi nuwaiya.

⁶ Iyako iya kaiwae na tembe hu vamodova takis, kaiwae rambarombaro thiye Loi le rakakaiwo na thi vatomweya ghanjimbanja e ghanjikaiwoko.

⁷ Hu vamboromboro wengi budakaiya mbaro ija hu vakatha. The takis thiya hu vamodo hu vamboromboro wengi, na budakaiva ghanjighaga hu vamodovao. Na thavala valikaiwae e ghanjiyavwatata mbala hu yavwatata wanangi. Na thavala valikaiwae ghanjitarawa mbala hu tarawengi.

Hu vegharethovu wenga

⁸ Mbanja e ghamighaga weya lolo regha, hu vamodovao. Ko ghamighaga inawe na mbala hu vakatha valanja enge iyake: hu vegharethovu wenga. Thela thongo i gharethovu weya ghau, iye kaero i vamboromboro Mbaro le renuwana.

⁹ Mbaro ija, "Tha u yathima," "Tha u gabo," "Tha u kaivi," na "Tha ghamara logheloghe." Mbaroke thiyake na mbaro vavanava ghanjirerenuwana thi ngari na regha e mbaro regha tine, ngoreiyake: "U gharethovu weya

ghanu ngoreiya tembe u gharethovuva e ghen ghanimbereghana.”

¹⁰ Thongo thela i gharethovu weya gheu, mane i vakatha vathariwe. Iya kaiwae thela i gharethovu weya ghau kaero i vamboromboro Mbaro le renuwaŋa.

¹¹ Hu vakatha iyake kaiwae hu ghareghare mbanake iya ra yakunake iye laghiye moli. Mbanake iye mbanja ngorami gharighari thi thuweiru e ghen a tine. Kaiwae mbanja va ra woraweya la lonweghathi righe, mbanako iya Kraiŋa ne i njoghamawe na Loi i vamoruinda; amba mava i ghenetha, ko iyemaenŋe mbanake iyake kaero i ghenetha moli.

¹² Kaero ighiviyavao, mbanja maiyavara. Ra viyathu momouwo thanavuniye ngoranda manjamanjala gharagagaithi.

¹³ Ra njimbukiki wagiya weya la yakuyaku na ngoreiya ghinda manjamanjala gharighariniye. Thava ra rombela warari raraithari na munumu, thava ra vakatha yathima thanavuniye na thanavu monjimonjina, na thava ra gagaithi na ra yamwakabu.

¹⁴ Ko iyemaenŋe hu njimbo Giya Jisas Kraiŋa, na thava nuwamina ina weya riwamina le renuwaŋa raraithari.

14

Thava la vakatha regha i vakatha ghamba dobu wenŋiya ghandaune vavanava

¹ Hu vanɣuvatha thela le loɳweghathi i njavovo, ko iyemaenɣe thava hu wogaithi weimi budakaiya nuwaiya amalaghiniye i vakatha.

² Lolo regha le loɳweghathi ɳgoreiye mbema i ghanɳgaenɣe ghanɳgake wolaghiye, ko iye-maenɣe lolo le loɳweghathi i njavovo ma i ghana gab.

³ Loloko iya mbema i ghanɳga enɣe ghanɳgake wolaghiye, thava i ghimaranɳona iya loloko ma i ghana gabiko. Na loloko iya ma i ghana gabiko, thava i wovatharithariɳa iya gabiko gharaghan, kaiwae Loi kaero i vanɣuvatha le lolo.

⁴ Thela ghen valikaiwae u wovatharithariɳa lolo regha le rakakaiwo? Ghagiyako tembe i wovathovuthovuyenɳa o i wovatharithariɳa. Na Loi ne i vanɣuvatha kaiwae amalaghiniye valikaiwae i vakatha na i vareminjembele amalaghiniye.

⁵ Lolo regha i renuwaɳa mbaɳa regha i boboma kivwala mbaɳa vavana Loi e marae, na lolo reghava i renuwaɳa mbaɳake wolaghiye ghanjirerenuwaɳa i mboromboro weya Loi. Lolo regha na regha tembe ghamberegha wo i renuwaɳa iyanɣaniya i thovuye na i tuthi.

⁶ Thela thonɣo i renuwaɳa mbaɳa regha iye mbaɳa laghiye, i vakatha ɳgoreiye Giya Loi ghayavwatata kaiwae. Thela thonɣo i ghanɳga gab, i vakatha ɳgoreiyako Giya Loi ghayavwatata kaiwae, kaiwae i vata ago weya Loi ghanɳgako kaiwae. Thela thonɣo ma i ghana gab, i vakatha ɳgoreiyako Giya Loi ghayavwatata kaiwae, na i vata ago weya Loi

ghaeko kaiwae.

⁷ Ma ghinda regha e yawayawaliye na e ghathovuye, na ma ghinda regha i mare e ghathovuye.

⁸ Thonjo lolo regha e yawayawaliye iyake Loi ghathovuye kaiwae, na thonjo lolo regha i mare Loi ghathovuye kaiwae. Iya kaiwae thonjo e yawayawalinda o ra mare, ghinda inandawe Loi.

⁹ Krai i mare na tembe i thuweiruva, na mbala iye ramaremare na e yawayawalinji ghanji Giya.

¹⁰ Ghemi hu ghambu thanavuko regha, buda kaiwae na hu wovatharithariŋgiya ghamunena thiye ma thi ghambu thanavuko reghako? Na ghemi iya mbema hu ghambu kamwathiko reghaenge, buda kaiwae na hu ghimara njonŋgiya ghamunena thiye ma thi ghambu iyako? Kaiwae nevole taulaghike ghinda ra ndeghati Loi e marae na iye mbala i ghathainda, ghandathanavu i thovuye o nandere.

¹¹ Ra ghareghare iyake kaiwae Buk Boboma inja ngorake:

Loi inja, "Kaiwae e yawayawalingu,
na emunjoru e yawayawalingu
gharigharike wolaghiye ne thi kururu e
ghamwanju,
na taulaghiko ne thiŋa,
mbema emunjoru ghino Loi."

¹² Iya kaiwae ghinda regha na regha ne ra uturŋgiya la vakathake wolaghiye weya Loi.

¹³ Thava tembe ra wovatharithariŋgiva ghandaune vavana. Ko hu renuwanja enje na

huṅa, “Thava lo vakathake ṅgoreiya ghamba thalativa wenḡiya wouneko, ne iwaenḡe thi doḡu.”

¹⁴ Weya Giya Jisas ya ghareghare wagiyaḡe ma ghaṅḡa regha tembe ghamberegha i vambighiyainda. Ko iyemaenḡe thoḡo lolo regha tembe ghamberegha i renuwaṅa na iṅa, “Ghaṅḡake iyake ne i vambighiyaḡo,” ghaṅḡako iyako kaero i vambighiya.

¹⁵ Thoḡo u vakatha ghanu ghare i viri, kaiwae u ghana ghaṅḡa regha iya amalaghiniye na i renuwaṅa ne i vambighiya, kaero ma u vakatha gharethovu. Thava ghen u ghana ghaṅḡako iyako na i vakatha u thivathari ghanuko yawaliye, iya kaiwae Krai va i marena.

¹⁶ Iya kaiwae, thava u vakatha gharighari vavana na thiṅava i thari budakaiya ghen u renuwaṅa i thovuye.

¹⁷ Kaiwae Loi le ghamba mbaro gharerenuwaṅa laghiye ma ina e ghaṅḡa na mbwa, ko iyemaenḡe gharerenuwaṅa laghiye iye la vakatha i thovuye, weindaḡiya ghandane namoghamwanda na warari i mena weya Nyao Boboma ra warariṅa.

¹⁸ Na thela thoḡo i kaiwo Krai kaiwae na le vakatha ṅgoreiya thiyake i vakatha Loi i warari na gharighari thi wovathovuthovuyeṅa.

¹⁹ Iya kaiwae ra rovurighheḡeṅa enḡe the vakatha i woraḡiya yakuyaku thovuye na iyaḡaniya i vavurighheḡeṅaḡiya gharighari.

²⁰ Thava u vakowana budakaiya Loi kaerova i vakatha ghanuna e yawaliye, kaiwae len renuwaṅa uḡava kaiwae ghaṅḡake wolaghiye

i thina Loi e marae mbema ra ghaningenge ghaningake wolaghiye ko thonngo the ghaninga ra ghan na i vakatha ghandau i dobu, i thari iyako.

²¹ Thonngo u ghana borogi o u muna waen, o thonngo u vakathava bigi, na len vakathako iyako i vakatha ghanuna i dobu, i thovuye moli mbala thava u vakatha thanavuko iyako.

²² Len lonweghathina bigibigike thiyake kaiwanji, i thovuye u vikiki mbe ghen enge na Loi hu ghareghare. Loi i warari kaiwanji, thavala thi ghareghare budakaiya thi vakatha i thovuye, na une ve yomara mane thi monjinana lenji vakatha kaiwae, kaiwae mbe thi vakathaenge budakaiya thi wovathovuthovuyeņa.

²³ Ko iyemaenge thonngo regha i numoghegheiwo mbaņa ne i ghana mbe ghaninga vavana, Loi ne i wovatharithariņa, kaiwae budakaiya i vakatha ma i mena ele lonweghathi tine. Na thonngo lolo regha i vakatha bigi regha ma i ghareghare i rumwaru Loi e marae, i vakatha thari.

15

¹ Ghinda iya la lonweghathike i vurigheghe valikaiwae ra thalavunģiya thavala thi njavovo e ghanjivuyowo, na thava mbema ra vakatha enge budakaiya ghinda nuwandaiya ra vakatha.

² Ghinda regha na regha ra renuwaņa enge ghandane lenji thovuye kaiwae, na ra vatada lenji lonweghathi i vurigheghe.

³ Krais ma mbe ghamberegha enge le thovuye kaiwae i rerenuwaņa. Ko iyemaenge Buk

Boboma e tine Kraisi dagewe Loi, inja, “Mbanja gharighari thi utuvathari e ghen, lenji utuvathariko vuyowae ghino ne ya wo.”

⁴ Utuutuko wolaghiye me vivako thi rorinjanganji Buk Boboma e tine, ghinda ghandavavaghare kaiwae. Buk le utuutu i thalavuinda na ra ghatanaghatigha ghandane lenji vakatha na i vavurighegha la lonweghathi, mbala weinda la gharematuwo ra roroghaga thovuyeko iya utuutuko thiyako thi woranjiya.

⁵ Ya nanjo weya Loi kaiwami. Iye i vakathanga hu ndeghathi vurigheghe na i vavurigheghenga e ghamivuyowona. Ya nangowe i kaiwo e ghemi na mbala huya yaku na namoghamwami. Iyake i thovuye moli wenjiya thavala thi ghambugha Kraisi Jisasi,

⁶ na mbala taulaghina ghemi hu wabwi na regha na hu wovavwenyevwenye Loi iye ghanda Giya Jisasi Kraisi ramae.

Toto Thovuye Jiu na ma Jiu kaiwanji

⁷ Kaiwae budakaiya kaero ma utunja e ghemi, hu vevanjugvathanga regha na regha ngoreiya Kraisi i vanjugvathanga na hu rakaru ele wabwi tine. Lemi vakatha ngoreiyako, mbala gharighari thi wovavwenyevwenyena Loi.

⁸ Kaiwae wo ya dage e ghemi, Kraisi i tabo rakakaiwo Jiu kaiwanji na i vaemunjoruna Loi le dagerawe wenjiya orumburumbunji, iya kaiwae ra ghareghare budakaiya Loi i utunja emunjoru.

9 Na tembe ngoreiyeva, Kraisi i tabo rakakaiwo, na i vakatha thiye ma Jiu thi tarawe Loi kaiwae i gharevirinangi. Ngoreiya Buk Boboma le worangiya inja,

“Thiye ma Jiu e tinenji ya tarawenge,
na ya wothuŋa idan ghatarawa.”

10 Na tembe injava,

“Wo hu warari, ghemi ma Jiu weimiyangiya Loi le gharighari.”

11 Na tembe injava,

“Ghemi ma Jiu, taulaghina ghemi wo hu tarawenja Loi,
gharigharina wolaghiye ghemi wo hu wothu tarawe amalaghiniye.”

12 Aiseya tembe injava ngoreiyake:

“Jese rumbuye regha ne i yomara i tabo kin,
na i mbaronangiya thiye ma Jiu na thiye thi worawe ghamidi.”

13 Ya nanŋo weya Loi ghemi kaiwami mbala amalaghiniye, iya i giya gharematuwoko e ghemi Nyao Boboma le vurigheghe e tine, i vakathanja hu warari na gharemalili i riyevanjara e lemi lonweghathinawe.

Pol i utuutu le kaiwo kaiwae

14 Lo bodaboda, mbe wombereghake vara e ghaminanguke ya ghareghare thovuye va i riyevanjananga, lemi ghareghare kaero i mborom-boro, na valikaiwami hu vavaghare wenjiya ghamunena.

15 Ko iyemaenge e letake iyake tine nuwannguiya ya woranngiya utuutu vavana e ghemi na ya vanuwoviringawe. Elo utuutu ma ya goravunyivunyiya utu regha kaiwae Loi kaero i giya wo bebe

16 na ya tabo Krai Jisas le rakakaiwo wenngiya thiye ma Jiu gharighariniye. Ghino ngorangwa ravowovowo na Totoko Thovuye iya i menako weya Loi, ghino ya vavagharena. Na lo vavaghareko iyako e tine ya vanngumenanngiya thiye ma Jiu weya Loi na ngoranngiya vowo thovuye, i warari kaiwae na Nyao Boboma i vabobomangi amalaghiniye kaiwae.

17 Iya kaiwae lo ghamba warari laghiye ya yaku weya Krai Jisas na ya kaiwo Loi kaiwae.

18-19 Weingu lo gharematuwo na ya utunga mbe budakai enge vara Krai le vakatha e ghino ya vanngunngiya thiye ma Jiu na thi ghambugha Loi. I vakatha ngoreiyako mbanja thi lonweya lo utuutu na thi thuweya lo vakatha. (19b) Thi thuwengo ya vakatha vakatha ghamba rotaele vavana na thiyako thi vatomwe iyannganiya emunjoru. Loi Une vurivurighhegheniye ina i kaiwo e ghino iya i vakathannngiya vakathake thiyake. Iya kaiwae, mbanja lo longalonga e tine, i ri Jerusalem na i wa ve wo Ilirikam, kaero ya utuvao Toto Thovuye Krai utuniye wenngi.

20 Nuwannguiya moli ya vavagharena Toto Thovuye wenngiya ghembaghamba iya amba ma thi lonweya Krai utuniye. Ma nuwannguiya ya kaiwo e ghembaghamba ngoreiya gharighari vavana kaerova thi kaiwowe ngoreiya lolo regha i vatadiva e lolo reghava ghambaghimbaghi.

²¹ Ngoreiya Buk Boboma i woran̄giya ija:
 “Thavala mava thi utun̄a utuniye
 wengi ne thi thuwe,
 na thiye ma thi lon̄weya utuniye
 ne thi ghareghare.”

Pol nuwaiya i wa Rom

²² Mban̄a i ghanagha kaiwoke iyake i laweghathin̄go na ma valikaiwan̄gu ya ghaona ya thuwenga,

²³ ko iyemaenge mban̄ake iyake lo kaiwo e valivan̄gake thiyake kaero iko. Na kaiwae theghathegha i ghanagha e tinenji ya rovurigheghe nuwan̄guiya moli ya ghaona ya thuwenga,

²⁴ iya kaiwae e mban̄ake iyake nuwan̄guiya moli ya ghaona ya thuwenga ko amba ya mwandi ya wa Spein. Amba muyai ne ya wa Spein mbowone ya lavutha e ghemi na ra lawarari na regha, hu lagiya nimami e ghino ko amba ya wa e valivan̄gako iyako.

²⁵ Ko amba muyai ne ya ghaona e ghemi, e mban̄ake iyake wo ya njogha Jerusalem na ya wogiya Loi le gharighari e ghembako iyako tine ghanjinwaewoke.

²⁶ Kaiwae ralon̄welon̄weghathi Masedoniya na Akaiya e lenji valivan̄ga tinenji, weinji lenji warari thi bigiraweya mani, na thi thalavun̄giya mbinyembinyengu Loi le gharighari e tinenji inanzi Jerusalem tine.

²⁷ Thi warari laghiye na thi vakatha iyake, ko iyemaenge emunjoru ghanjighaga

weya Jiu inanji Jerusalem. Kaiwae Jiu ralonwelonweghathi inanji Jerusalem va thi giya Toto Thovuye wengiya thiya ma Jiu gharighariniye, valikaiwae thiye ma Jiu gharighariniye thi giya bigibigi wengiya thiye inanji Jerusalem.

²⁸ Mbanja ne ya vakathavao kaiwoke iyake, na ya thininjogha mwaewoke iyake wengiya ralonwelonweghathi Jerusalem e tine, na e ghereiye amba ya ghaona ya lathuwenga lo ghinagha Spein kaiwae.

²⁹ Ya ghareghare, mbanja ne ya ghaona e ghemi, Krai i giya le mwaewo laghiye weinda.

³⁰ Lo bodaboda, ghinda ghanda Giya Jisas Krai na Nyao Boboma wengi ra vegharethovu weinda, iya kaiwae ya vavurighegheghe na weinguyangiya ghemi elo rovurighegheke tine hu nango weya Loi kaiwangu.

³¹ Hu nango vurigheghe weya Loi na iye i njimbukikingo na i vamorungo wengiya thavala ma thi lonweghathi Jiu e tinenji Judiya e tine. Na hu nango mwaewoke ya thininjoghake Jerusalem Loi le gharighari ne thi warari kaiwae.

³² Iya kaiwae, thongo Loi le renuwanja ngoreiye, weingu lo warari ne ya ghaona e ghemi, na weinguyangiya ghemi namoghamwanda ra vevairiinda.

³³ Ya nango weya gharemalili gha Loi i yaku taulaghina e ghemi. Mbwana. Ngoreiye.

16

Pol i gomwaewo

¹ Nuwan̄guiya ya govambwara e ghemi lounda Pibi na hu warari kaiwae, elaghiniye ekelesiya Sinkreya gharathalavu regha.

² Ghanda giya e idae hu van̄guvatha ngoreiya Loi le gharighari thi vevan̄guvathan̄gi, na thon̄go bigibigi vavana i tubowe, hu thalavu, kaiwae iye le thalavu i laghiye wen̄giya gharighari lemoyo, na ghino tembe ngoreiyeva.

³ Hu giya lo mwaewo weya Prisila weiye le ghimoru Akwila. Thiye lo valirakakaiwo Krai Jisas kaiwae.

⁴ Thiye thi vatomweyathu yawalin̄ji kaiwan̄gu, na ma thi mararu mare. Iyake kaiwae ya vata ago laghiye wen̄gi. Ko ma mbe wombereghake en̄ge, ko ekelesiya wolaghiye thiye ma Jiu gharighariniye tembe thi vata ago wen̄giva.

⁵ Na tembe ya dage mwaewo wen̄giva ekelesiya thavala thi kurukururu e len̄ji ngolo.

Ya dage mwaewo weya wou na valigharegharen̄gu Epainetas, iye va i lon̄weghathikai vara Eisiya e tine.

⁶ Ya mwaewo weya Meri, iye i kaiwo laghiye kaiwami.

⁷ Ya mwaewo weya Endronikas. Na ya mwae-wova wevo eunda, Juniya. Thiye lo vali Jiu na va wein̄guyan̄gi wo yaku e thiyo tine. Thiye ghalin̄ae gharaghambi na e idan̄ji. Thiye va thi lon̄weghathikai amba muyai ghino.

⁸ Ya mwaewo weya Ampliyatas, iye ya gharethovu na kaero i tubwe weya Giya.

⁹ Ya mwaewo weya Ubanas, iye la valirakakaiwo weya Krai, na ya mwaewo weya Stakis, iye ya gharethovu.

¹⁰ Ya mwaewo weya Apelis, iye vuyowo i ghanagha kaiwanji i ghatanaghathi, na i lonweghathimbele.

Ya mwaewo wenjiya Aristobulas le ngolo gharayakuyaku.

¹¹ Ya mwaewo weya Herodiyon, iye lo vali Jiu.

Ya mwaewo wenjiya ralonjwelonjweghathi thiya yaku Nasisas ele ngolo.

¹² Ya mwaewo wenjiya wanakauke thiyake, Tripina na Triposa, thiye thi kaiwo laghiye Giya kaiwae, na tembe ngoreiyeva ya mwaewo weya wevo eundava, Pesis, iye valigharegharengu na kaiwo lemoyo i vakathanji Giya kaiwae.

¹³ Ya mwaewo weya Rupas, iye Giya le rakakaiwo thovuye moli, na ya mwaewo weya tinae, elaghiniye gathanavu e ghino ngoreiya tinangu.

¹⁴ Ya mwaewo wenjiya Asinkritas, Plegon, Hemis, Patrobas na Hemas, weinjiyanjiya la bodaboda vavana thiya yaku.

¹⁵ Ya mwaewo wenjiya Pilologas na Juliya, Neriyas na louye, na Olimpasi, na tembe ya mwaewo wenjiya Loi le gharighari thiya yaku weinjiyanji.

¹⁶ Hu livamomoya nimami wenjiya ghamunena na hu vemwaewo wenga kaiwae ghemi Loi le gharighari. Krais le ekelesiyake wolaghiye e valivanjake iyake thi mwaewo e ghemi.

¹⁷ Lo bodaboda, ya vavurighengha na hu njimbukiki wagiawenga wenjiya gharighari thi vakatha wabwi na wabwi thi vewogaiti wenji, na thi vakatha ghamba thalativa wenjiya

ralonwelonweghathi. Gharighariko thiyako lenji vavaghare i goruweyathu vavagharena iya emunjouruna kaerova thi vagharengana. Thava hu ghambungi, hu botewoyathungi.

¹⁸ Kaiwae gharighari ngoranjiyako ma thi kaiwo ghandu Giya Krai kaiwae, ko mbe thi kaiwo enge the bigibigiya i vawararangi kaiwanji. Lenji utuutuko i rumwaru, i loghe na i wo gharighari nuwanji, thiye ma nuwanji i rumwaru na ma thi ghareghare thi yarongi.

¹⁹ Ralonwelonweghathi e valivanjake wolaghiye kaero thi lonweya utunimi na lemi ghambugha Toto Thovuye, iyako kaiwae ya warari kaiwami. Ko iyemaenge nuwanjuiya hu thimbanu thanavu thovuye na thava hu thimbanu thanavu raithari.

²⁰ Mbanu nasiye gharemalili gha Loi i vurighiyaghiya Seitan e gheghemina raberabe.

Ghandu Giya Jisas le mwaewo i yaku e ghemi.

²¹ Timoti, iye lo valirakakaiwo, i mwaewo e ghemi, na Laisiyas, Jeison na Sosipata, thiye lo vali Jiu, tembe thi mwaewova e ghemi.

²² Ghino Tetiyas, ya rorinjona letake iyake, Pol iye ghalinae, Krai e idae ya mwaewo e ghemi, ghemi lo valiralonwelonweghathi.

²³ Gaiyus ele ngolo ghino ya yakuwe na e ngoloke iyake tine ekelesiya thi memevathavathawe lenji kururu kaiwae, i mwaewo e ghemi.

Erastas, iye ghembake iyake ghamani gharanjimbunjimbu, weiye ghaghanda regha Kwautas,

thi mwaewo e ghemi.*

²⁵ Ra wovavwenyevwenyenya Loi, iye valikaiwae i vavurighegha lemi lonweghathina ngoreiya Toto Thovuye va ya vavagharena, iye Jisas Krai utuutuniye. Utuutuko emunjoru iyako mbanja molao moli va mbowo i rothuwele.

²⁶ Noroke emunjoruko iyako thi govambwara. I rangima ghalinae gharautu lenji rorori e tine, na Loi memeghabananiye i govambwara mbala vanautumake wolaghiye thiye ma Jiu gharighariniye kaero thi ghambu ghalinae kaiwae thi lonweghathi.

²⁷ Weiye Jisas Krai le thalavu, ra wovavwenyevwenyenya Loi, iye ghamberegha rathimbathimba moli, mbanjake wolaghiye, ma ele ghambako. Mbwana. Ngoreiye.

* **16:23** Righetoruke iyake ma lemoyo ina Buk Boboma Togha tometi noroke. Injake: ²⁴ Ghandi Giya Jisas Krai mbe ghare wenga taulaghina e ghemi. Mbwana. Ngoreiye.

Toto Thovuye Loi Ghalinae
Portions of the Holy Bible in the Sudest language of
Papua New Guinea
Buk Baibel long tok ples Sudest long Niugini

copyright © 2014 Wycliffe Bible Translators, Inc.

Language: Sudest

Dialect: Tagula

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-09-23

PDF generated using Haiola and XeLaTeX on 28 Dec 2024 from source files dated 31 Aug 2023

7a63d67b-b890-5db0-8880-b6fd64f3b62f